

Na Maak

A Lagasai Roxo Na Maak A Xaleie

A Ferawaian Paamua

A Lagasai Roxo si Maak a bas pana mu sangasan e mu vilaana si Yesus. A fufuna lamonan molava si Maak lana lagasai aanabe' ve a malaan: na Yesus ve a Natuna Piran e a Mataa Failai sina Piran, taasaxa mu Juda ri pife taraxalie e ri niil fataxutan tul a mataa ina fakaxupaan nari. E na Maak a vubuk xuus fatexaas a mu Juda e mu rabuna xapiak sait o ri fo milung patak paaliu sena salan sina Piran. E voxo nane taxa kuus pana maana mu vilaana e faisok si Yesus xena faxalit nari o nane a Natuna Piran e pife natuna mataa mon.

A buuk aanabe' a toxan a paferawaian pama malaan:

- 1) Paamuina faisok si Yesus - palagasai 1:1-13
- 2) A faisok si Yesus pe Galili - palagasai 1:14–7:23
- 3) A faisok si Yesus pe la xasano bina - palagasai 7:24–10:34
- 4) A faisok si Yesus pe Jerusalem - palagasai 11:1–13:37
- 5) A maatan e to fa'ulaian si Yesus - palagasai 14:1–16:20

A Mataa I Taa Savat Paamuin A Yesus

Mt 3:1-11; Lk 3:2-16; Jn 1:6-8,19-27

1 ¹A Lagasai Roxo se Yesus Kraisi aava lak sina Piran, a tangpat malaan: ²na Aisaia, a saxa mataa ina kuus fatuxai sina Piran ti kavai a xalei a ferawaian sina Piran pa Yesus.

“Langaiiau, ne taa feng a mataa ina lisan a ferawaian siak, i taa savat paamuin nano e i taa faigotan a salan siim. ³A ling ina mataa aave i taa kel pe la bina vingil, ‘Faigotan a salan xana Memai. Vil faxaradak a salan sina.” *Mlk 3:1; Ais 40:3*

⁴Na Jon xo, a mataa ina fasufan, a savat pe la bina vingil e a xuus a mu rabuna o ri taa puk a xunus iri e a fasuf nari talo a Piran i taa lamon tapin a vilaana saat siri. ⁵E a maana mu rabuna ti Judia e ti Jerusalem

ri paan xe si Jon e ri fe kuusan fasavat a maana vilaana saat siri e nane fasuf nari lana Raarum Jordan. ⁶Na Jon a mataa valagof e vesan a marapi sina pana fui ina 'kaamel'. E nane pis nane xa pana yowang aava vesanan pana vipin ina 'kaamel' e fuuna ngan a sakawa e vevoi ti la latan. ⁷Na Jon xo, a kuus famatavas malaan, "A toxan a mataa i taa filimaan lumui lamiak, a mataa aave a faagut sega e nenia vaxa ne suai faagut sena. Ne pife fexaxaas sena mulus a 'slipa' ti la kana. ⁸Naboxo ne taxa fasuf nami pana raarum tuuna taasaxa nane, i taa fasuf nami pana Vovau Xaradak."

A Fasufaan Na Yesus

Mt 3:13-17; Lk 3:21-22; Jn 1:28-34; Mt 4:1-11; Lk 4:1-13

⁹Mui famodak na Yesus xo a savat ti la bina Nasaret pe Galili e na Jon a fasufe lana Raarum Jordan. ¹⁰Layaan nane laakmaan ti la raarum a xalum a xunavata a talakas e a Vovau Xaradak, malaan sena vaalus, a sivi xuluna. ¹¹E saxa ling aava savat ti pe laa'ui lana vata a kuus malaan: "Nano, no natuk, ne vubuxan xasingit nano, a xunus iga a roxoian nano!" ¹²E fataapus temasaat a Vovau Xaradak a feng na Yesus xe la bina vingil. ¹³E nane waan pave fefexaxaas sena yaan sangafilu talafaat e na Setan a valame. A waan la palou ina mu vupung taasaxa mu angelo ri maa xavange.

Na Yesus A Tangpat Pana Faisok Sina Pe Galili

Mt 4:18-22; Lk 5:2-11

¹⁴Na Jon fo vipis xo e na Yesus a paan xe pe Galili e fe kuusan fasavat a Lagasai Roxo sina Piran. ¹⁵Nane kuus, "A yaan tuuna fo savat xong. A fatataganan sina Piran fo savat faasilak naboxo. Mi taa puk a xunus imi e mi taa namkai sena Lagasai Roxo."

¹⁶Saxa yaan na Yesus taxa lo sangas et la vangana Laman Galili e nane xalum na Saimon xuvul pa tina, na Endru. Narie, re taxa fati a vana pe la taas senaso re fuuna faasot pana din. ¹⁷Na Yesus moxo, a xuus nare, "Usiau e nenia, ne taa fapiti name pana vilaana ina pataasaana rabuna." ¹⁸E fataapus re ta'ulan a vana sire e re usie.

¹⁹E rutul falet famodak fulaa e na Yesus a xalum na Sebedi e a ro lak sina, na Jems e na tina na Jon. Narutul taxa nai lana xaati e rutul taxa faxaradak a vana sirutul. ²⁰E nane xel nare e re ta'ulan na tamare lana xaati xuvul pana mu sisiak siri e re usi na Yesus. ²¹E nari xapiak, ri falet xe la bina Kapanam.

A Mataa Pana Vovau Saat

Lk 4:31-37

Layaan a Yaan ina Fangaafusan sina mu Juda a savat, na Yesus xuvul pana mu rabuna, ri laak xe la lifu ina faxuvulan sina mu Juda e nane fepitaa tapang.

²²A mu rabuna ri langai a ferawaian sina e ri ipul senaso a ferawaian sina toxan a gutan, pife malaan sena fepitaian sina xasano rabuna aava ri masam pana vilaana si Moses. ²³E monabe! mon ri ipul sena mataa pana vovau saat moxo, a laak saa la lifu ina faxuvulan e maa barak xuluri malaan, ²⁴“Yesus ti Nasaret, no vubuk vil a so semaam? Naak no vubuk vil pengan nemaam! Ne texaas sema, nano, no Mataa Failai sina Piran.”

²⁵Na Yesus moxo, a maraleiane e a kuus, “No waan kasam e no ta'ulan a mataa aanabe!” ²⁶E a vovau saat a vil faradakui a mataa e a kuup faagut e nane ta'ulane.

²⁷E mui a mu rabuna pave, re ipulan na Yesus e ri fefiaian nari e ri kuus, “A so ta mo nabe!? A fepitaian fa'ui pana gutan, bo? A mataa aanabe! a farawei a mu vovau saat e ri langai sina.” ²⁸Lavaxa, a lagasai pana vilaana si Yesus a falet fataapus xe la maana mu bina pe Galili.

Na Yesus A Vil Faroxoi A Rabuna Xaves

Mt 8:14-17; Lk 4:38-43

²⁹Lumui na Yesus e mu fefeng sina, ri savat xe lamalei e ri fe paan xe la lifu si Saimon narie Endru. Na Jems e na Jon, re falet xuvul pari sait. ³⁰Na imu Saimon i taxa mati xuluna ivin e toxan a giisan pana tana lalagaf. E fataapus ri xuus fatexaas na Yesus pana. ³¹Na Yesus a paan xe sina e tao a mana e fatamasiaxe. A giisan sina a taxapus e nane tavai nari pana fanganan xari.

³²La leaaf layaan a ngaas a rul, a mu rabuna ti la bina, ri lisan a maana rabuna aava ri toxan a giisan xuvul pana maana rabuna ri toxan a vovau saat xe si Yesus.^a ³³A mu rabuna xapiak ti la bina, ri faxuvul pe la matana lifu. ³⁴E nane vil faroxoi a rabuna aava ri toxan a mu giisan e a gei tapin a mu vovau saat. A mu vovau saat xo, ri texaas sena taasaxa nane ti votan nari sena ferawai.

³⁵La paanen lolof, nane tamasiak xe lamalei e fe paan xe la saxa nobina gof rao i fenung xe sina Piran. ³⁶E na Saimon xuvul pana mu fefeng sina ri seng na Yesus. ³⁷Ri fe tingin xo nane e ri xuuse, “A maana rabuna, ri taxa fiaian nano.”

³⁸Taasaxa na Yesus a susuaa malaan, “Naapalaan, taara taa paan xe la saxano bina faasilak, rao ne ferawai pari. Nabe! a fufuna filimaan siak.” ³⁹Nane falet xe la maana mu bina pe Galili e a ferawai lana mu lifu ina faxuvulan e gei tapin a mu vovau saat la tana rabuna.

A Mataa Pana Tapak

Mt 8:2-4; Lk 5:12-14

⁴⁰La saxa yaan, saxa mataa aava tana tapak, a savat si Yesus. Nane bukaak e fenung xe si Yesus e kuus malaan, “Tamo no vubuxane, no taa vil faroxoiau.”

^a 1:32 A yaan sina mu Juda i taa tangpat la yaan a ngaas taa rul. Nabe! layaan a ngaas a rul a Yaan ina Fangaafusan a taxapus e a yaan mata ina ‘wiik’ taxa tangpat e voxo a rabuna ri fexaxaas sena faisok fulaa.

⁴¹Na Yesus xo muluk nane e tao a tana e xuuse, “Aang, ne vubuxane, naboxo a giisan siim a taxpus.” ⁴²E fataapus a tapak sina mataa aave a malit e nane fo roxo.

⁴³Na Yesus a pebukan faagutane e feng fa'ulie. ⁴⁴A xuuse malaan, “Muta kuus fepuk pana faroxoiaan nano. No taa falet e no fe faxalum a taam xe sina priis e no taa tavai a Piran pana tatavaian siim. A tatavaian aave i taa usi a vilaana si Moses. ⁴⁵Taasaxa mataa aave a falet e kuusan fasavat a roxoiaana aava na Yesus fo vile. Pevoxoxo na Yesus pife fexaxaas sena laak la bina saxa ulaa rabuna ri tamaa fatagule. E voxoxo nane paan xe pe la xobingil e maana mu rabuna xaves ri taxa falet xe sina pave.

Nane A Vil Faroxoi A Maalapen

Mt 9:2-8; Lk 5:18-26

2 ¹La saxanu yaan fo falet e nane ulaa fulaa xe Kapanam. A rabuna ri langai o nane i taxa waan lana saxa lifu pave. ²E a malila ri savat faxuvul e a lana lifu febas e faasilak la matana lifu sait. E nane ferawai xe sina rabuna pana Lagasai Roxo. ³A saxanu tuvaat talafaat, ri lisan a saxa mataa a kana e mana maat e ri yaase pana ivin. ⁴Ri pife fexaxaas sena yaase xe si Yesus senaso a malila. E voxoxo ri laak xe laa'ui xuluna lifu e ri ngas a nobina xena faduiaana mataa. E ri fasivie pana ivin xe si Yesus. ⁵Na Yesus a xalum a namkaian siri e a xuus a maalapen malaan, “Lak siak, ne lamon tapin a vilaana saat siim.”

⁶Taasaxa xasano rabuna aava ri masam sena Vuputkai si Moses, ri taxa nai lamon lana lalamonan siri sena ferawai si Yesus e ri lamon malaan, ⁷“Xenaso a mataa aanabe' a kuus fasaat malaan? Nase' ta mataa fexaxaas sena lamon tapin a vilaana saat sina mataa? A faisok sina Piran sang mon! Naak nane taxa bit!”

⁸Fataapus paalii na Yesus fo texaas sena lalamonan siri e a kuus, “Nami, mi lamon fasaat! Xenaso mi lamon malaan pana nobina siak ina lamon tapin a vilaana saat sina mataa aanabe'? ⁹A so ta ferawai a malui sena kuusanaana? Tamo ne taa kuus xe sina maalapen, ‘Ne taa lamon tapin a vilaana saat siim!’ o tamo ne taa xuuse, ‘No tamasiak e no siak a ivin siim e no falet.’ ¹⁰Talo mi taa texaas sega, a Natuna Mataa aava toxan a gutan xena lamon tapin a mu vilaana saat sina rabuna, ne taa vile malaan.” E nane kuus xe sina maalapen, ¹¹“Nenia, ne xuus nano, tamasiak, siak a ivin siim e no paan xe la lifu siim!” ¹²E a maalapen a tamasiak marasaxa e siak a ivin sina e savat xe lamalei. A mu rabuna xapiak ri xalume e ri ipul e ri kuus fati a isina Piran. E ri kuus malaan, “Taara pi xaxalum a buk vilaana malaan lumua.”

Na Yesus A Xel Na Matiu Livai

Mt 9:9-13; Lk 5:27-32

¹³Na Yesus a sangas ulaa fulaa xe la vangana Laman Galili e a malila ri paan xe sina e nane fapiti nari pana lagasai sina Piran. ¹⁴Layaan nane

taxa sangas falet, a xalum na Matiu Livai, a lak si Elfias, i taxa nai la lifu ina maraan taakis. Na Yesus a xuuse, “No usiau!” E nane tamasiak e usi na Yesus.

¹⁵Mui xo na Yesus fe fangan lana lifu si Matiu Livai e a mu rabuna ina siak taakis e mu rabuna pana vilaana saat, nari xapiak, ri taxa fangan xuvul pa Yesus e mu fefeng sina. A mu rabuna aava ri mangil sena vilaana saat siri, ri vubuk langaie e voxo ri usi xolane. ¹⁶E saxano rabuna aava ri usi a vilaana sina mu Ferasi, ri xalum na Yesus i taxa nai fangan xuvul pana mu rabuna pana vilaana saat e mu rabuna ina siak taakis. E ri fin a mu fefeng sina, “Xenaso nane taxa fangan xuvul pana mu rabuna ina siak taakis e mu rabuna pana vilaana saat? Naak a vilaana aanabe' pife roxo.”

¹⁷Na Yesus a langai a ferawaian siri e xuus nari, “A rabuna aava ri piau ta giisan, ri pife paan xe sina mataa i'irin. Piau! Nenia, ne pife filimaan nabe' xena xelaana mu mataa aava ri lamon o ri taxa waan faroxo. Ne savat xena xelaana mu rabuna aava ri texaas o a vilaana siri a saat.”

A Vilaana Ina Falfaalan

Mt 9:14-17; Lk 5:33-38

¹⁸Xasano Ferasi e mu rabuna aava ri usi na Jon, a mataa ina fasufan, nari xapiak, ri fuuna falfaal e saxano rabuna ri savat si Yesus e ri fiaf malaan, “Senasou a fefeng si Jon e mu Ferasi ri fuuna falfaal taasaxa mu rabuna siim ri pi falfaal?”

¹⁹Na Yesus a xuus nari, “Naak a mu fesing sina saxa mataa aava rao i tamai, ri taa faalaan pana fanganan layaan a mataa aave i taxa waan xuvul pari? Piau! Tamo mataa aava rao i tamai i taxa waan xuvul pari, ri taa pife falfaal. A yaan ina merawan mon! ²⁰Tamo mataa naang i taa paan tapin a mu fesing sina, lavaxa la yaan aave bak, ri taa falfaal xena fakalimaan a mimilisaatan siri.”

²¹E nane fin nari, “Nase' ta mataa i taa kap a valof ina marapi xavai pana pamarapi fa'ui? Tamo no taa vil malaane a marapi fa'ui i taa gat faxuvule e a valof i taa tiririk falava. ²²E piau ta mataa i taa xapis a uma lana vaafa xavai. Tamo i taa vil malaane a vio i taa laak lana e i taa kawaasan a fanganan. A fanganan e vaafa taa kawaasanan. A rabuna masam, ri taa pai a vaafa fa'ui xena uma fa'ui.^b

^b **2:22 (a)**Na Yesus a kuus malaan senaso rao i xuus famasam nari pana lalamonan sina Piran. A lalamonan malaan, “Nase rao i usi a ferawaian sina Piran nane pife fexaxas sena usi a vilaana ti kavai sait. A vilaana ti kavai e ferawaian si Yesus a patak famodak.” **(b)** Lana pok Inglis a paferawaian aanabe' taxa usi a xasa ferawaian paap malaan: “Mi taa pife timin a wain fa'ui lana vapak xavai aava ri vesane pana vapak ina tiir, piau! Layaan mi taa vil malaane a vapak xavai i taa tiririk e a wain taa talatuu. Taasaxa mi taa timin a wain fa'ui lana vapak ina tiir fa'ui.”

A Fufuna Yaan ina Fangaafusan

Mt 12:1-8; Lk 6:1-6

²³La saxa Yaan ina Fangaafusan na Yesus a sangas lana uma e mu rabuna aava ri taxa usie ri lagai e ri taxa murul a fanganan pave e ri taxa ngane.^c ²⁴E saxano Ferasi ri xuus na Yesus, “Xalum nari, ri taxa vil a faisok la Yaan ina Fangaafusan. A vuputkai sitaara a kuus votan a vilaana ina faisok la Yaan ina Fangaafusan. A pife roxo ri taa vil malaane la yaan aanabe!”

²⁵Na Yesus a xuus nari, “Naak mi pife texaas sena xuuskuus ina vilaana a savat se Devit layaan nane xuvul pana mu rabuna sina ri piau ta fanganan e ri lagai? ²⁶La yaan si Abaiata aava saxa paamua ina mu priis sina Piran, na Devit a laak lana lifu lotu sina Piran e nane ngan a bret taap aava mu priis sina Piran sang mon ri fexaxaas sena ngane. Taasaxa na Devit a ngane e tavai a rabuna sina pana.” *1 Sml 22*

²⁷Ne Yesus a xuus nari fulaa, “A Piran pife timin a mataa xena xavang a Yaan ina Fangaafusan, piau! Nane timin a Yaan ina Fangaafusan xena xavangaana mataa. ²⁸E voxo, a Yaan ina Fangaafusan xo, a Natuna Mataa a paamuiane.”

Na Yesus A Vil Faroxoi A Saxa Mataa

Mt 12:9-14; Lk 6:6-11

3 ¹La saxa Yaan ina Fangaafusan fulaa na Yesus a laak lana lifu ina faxavulan e a mataa mana tapil i taxa waan. ²E saxano rabuna ri waan bang na Yesus pana senaso ri vubuk texaas tamo nane i taa vil faroxoi a mataa aave la Yaan ina Fangaafusan talo ri taa tiise sena. ³E na Yesus moxo, xuus a mataa aava mana tapil, “Tamasiak e no tigina la nona rabuna.”

⁴E na Yesus a fin a rabuna, “A vuputkai si Moses a kuus o taara taa vil a vilaana roxo la Yaan ina Fangaafusan o taara taa vil a vilaana saat? A kuus o taara taa xavang a mataa talo i taa waan faroxo o taara taa punuk a mataa?” E nari, ri pife sui a ferawaian sina, ri nai kasam mon.

⁵E na Yesus a xalum nari e a vilauna a kasal taasaxa muluk nari senaso ri vungut sena mamaaluxan sina Piran. E nane xuus a mataa, “No faxaradak a maam!” E a mataa faxaradaxe e a mana fo roxo. ⁶E fataapus a mu Ferasi ri tamasiak e ri fe savat faxuvul sina nutuvaat si Herot. Nari, ri ferawai faxuvul xena seng ta nobina xena punuxaan na Yesus.

A Maliila Ina Rabuna Faasilak La Laman Galili

Mt 12:15-16; Lk 6:17-19

⁷Na Yesus xuvul pana mu fefeng sina, ri falet e ri fe nai la vangana raarum e saxano rabuna ti Galili e ti Judia ri usie. ⁸A rabuna ti

^c **2:23** Ri pife fenau, a vilaana roxo sina mu Juda; tamo ri lagai ri fexaxaas sena siak fanganan ti la saxano uma.

Jerusalem, ti Idumia e ti lu paa paaliu se Jordan e ti la saxa ro bina Tair e Saidan, a malila molava paaliu ri langai pana faisok na Yesus a vile e voxo ri savat faxuvul. ⁹Na Yesus a xuus a mu fefeng malaan, “A malila aava ri taxa waan, ri tamaa fatalinau. Ne vubuxan ta saxa xaati i taa waan bangau e ne taa xawas xuluna.” ¹⁰Lumua nane fo vil faroxoi a malila e ri naixaam soxote rao ri taa tao tuunei a tana senaso ri taxa vubuxan a roxoyan. ¹¹E layaan a mu vovau saat ri xalume, ri turung xe sina e ri xukulai faagut malaan, “Nano ve no Natuna Piran!” ¹²E nane ferawai faagut xe siri o ri muneta fasavat a isina la matavas.

Na Yesus A Xel A Yaamut Sangafilu Saxa Pana Taragua Sina

Mt 10:2-4; Lk 6:14-16; Fk 1:13

¹³Mui na Yesus a laak xuluna put e xel nari aava nane vubuxan nari o ri taa filimaan xe sina. E ri savat. ¹⁴E nane siak fati a sangafilu saxa pana taragua e a fasoxot nari pana mu Yaamut. Nane xuus nari, “Ne fo fati nami rao mi taa waan xuvul paga. Ne taa feng nami vaxa xena kuusan fasavat a Lagasai Roxo ¹⁵e vaxa mi taa toxan a gutan xena gei tapin a mu vovau saat.” ¹⁶A mataa sangafilu saxa pana taragua aave voxo: na Saimon aava ri xalie pana xasa isin, na Pita, ¹⁷e na Jems, a lak si Sebedi xuvul pa tina, na Jon. Nane xali nare pana saxa isin, Boanesis, a malasuf ina isin aanabe' ‘natuna vabarak.’ ¹⁸E na Endru, na Filip, na Baatalamiu, na Matiu Livai, na Tomas e na Jems a lak si Elfias, na Taadius, na Simon ti la parabuna Selot,^d ¹⁹e na Judas Iskeriot, a mataa aava pet lisan na Yesus xe sina mu rabuna saat xena punuxaana.

²⁰Layaan na Yesus a ulaamaan xe la lifu siri, a mu rabuna ri savat faxuvul fulaa xe sina. E voxo na Yesus xuvul pana mu fefeng sina ri piau ta yaan xari xena fanganan. ²¹A mu pabung si Yesus, ri langai o nane taxa waan fulaa e ri paan rao ri taa xel fa'ulie senaso a rabuna, ri xuus nari, “Naak na Yesus taxa ngong.”

Na Yesus A Xalian Pa Bilsibul, A Paamua Sina Mu Vovau Saat

Mt 12:25-29; Lk 11:17-22

²²A saxano rabuna aava ri masam pana mu vilaana ti Israel e ri fuuna waan pe Jerusalem, ri sivimaan xe Galili. Ri ferawai se Yesus malaan, “Na Bilsibul a vawe e i taxa waan sina. Naak, nane taxa gei tapin a mu vovau saat pana gutan sina matalava sina mu vovau saat.”

²³Na Yesus a xel faxuvul nari xe sina e ferawai xe siri pana saxano ferawaian paap malaan: ²⁴“Tamo a faxatangan sina rabuna i taa tapagal fepatok e ri taa fevis, a vilaana ina faxatangan i taa pife waan fatateak!

^d **3:18** A mu Selot ri vubuxan o saxa siri mu Israel i taa piran king siri. Ri baian o na Sisaa ti Rom i taa siak fati a saxa topen, malaan se Herot, xena paamuian nari.

25Tamo a pabung taa tapagal fepatok e ri taa fevis, a pabung aanabe' i taa pife waan faroxo. 26Tamo na Setan i taa vis fa'uli nane xa e saxano saxa sina ri taa faapalau sena, nane i taa pife gut fulaa, piau! Nane fo taxapus! 27Tamo ta saxa mataa rao i taa fenau, nane pife fexaxaas xena laak palau lana lifu sina mataa tateak, piau! Paamua i taa pis fatateak a mataa aave e mui i taa siak tapin a maana mo sina ti la lifu. 28Ne xuus tuunei nami, a Piran sang mon i taa lamon tapin a mo mosaat e mu ferawaian saat aava mu rabuna ri vile. 29Taasaxa nase' ta mataa i taa ferawai fasaat pana Vovau Xaradak, a Piran i taa pife lamon tapin a vilaana saat sina naboxo e lumui sait, piau! A vilaana saat sina mataa aave i taa waan vulai xe vulai!"

30Na Yesus a kuus malaan senaso a rabuna ri fo kuus o nane toxan a vovau saat paaliu.

A Pabung Si Yesus Ri Savat

Mt 12:46-50; Lk 8:19-21

31La saxa yaan na nina Yesus xuvul pana mu ti Yesus ri savat. Ri tigina lamalei e ri xuus fatexaase rao i taa langai siri. 32A malila aava ri taxa nai fakaliuane ri xuuse, "No langai? Na ninaam e mu tiam ri taxa waan lamalei e ri taxa xel nano."

33E nane sui a ferawaian siri malaan, "Nase' ve na ninaang e mu tiak?"

34E na Yesus a kaalum fepuk la palou ina rabuna aava ri taxa nai fakaliue e a xuus nari malaan, "Mi xalum na ninaang e mu tiak, 35a mu rabuna aava ri usi a ferawaian sina Piran, nari ve ri mu tiak e vasaak e ninaang!"

A Mataa Ina Kaapisan

Mt 13:1-15; Lk 8:4-10

4 1Na Yesus a faisok fulaa pana fapitiaana rabuna la vangana Laman Galili. E nane xawas xuluna xaati senaso a mu rabuna xaves ri savat faxuvul sina. E nane nai xuluna xaati aava taxa waan lana raarum e mu rabuna xapiak ri taxa nai langai pe la gun e faasilak la vangana raarum. 2Na Yesus a tavai nari pana mu ferawaian paap. Nane ferawai xe siri malaanabe': 3"Mi langai! A saxa mataa a falet e fetapalan xolan a kam ina 'wiit' la uma. 4Nane tapinete e saxano kam ina 'wiit' ri poxo lana salan e mu maanu ri maa ngan xapine. 5E xasano kam ri poxo la nobina toxai faat. A xavala pife temasaat xuluna e pife sivi temasaat lapia e a kam a fadui a xarei fataapus. 6Taasaxa ngaas a lange e a kam aanabe' pife boak faroxo, a piloxos e femaiyang. 7E xasano kam ina 'wiit' ri poxo lana yeis tuturuk. E a yeis aanabe' a palak e fe xafute e a 'wiit' pife fuua. 8Taasaxa xasano kam ina 'wiit' ri poxo lana xavala roxo e ri palak faroxo e ri fuua. Saxanofuna ri fuua faroxo, xasanofuna ri toxan a kam xaves e saxanofuna ri toxan a kam xaves paaliu."

⁹E na Yesus a xuus nari, “Tamo mataa i taa lamon pana ferawaian siak i taa tingin a malasuf ina.”

¹⁰Mui, lamina malila fo paan, a mu fefeng sina xuvul pana xasano rabuna ri fine pana mu ferawaian paap sina. ¹¹Na Yesus a xuus nari, “A Piran a vubuk o mi taa masam faroxo sena ferawaian sina e ne fo xuus fatexaas nami o a fatataganan sina fo savat xo. Taasaxa mu rabuna aava ri waan lamalei ri taa langai a mu ferawaian siak lana ferawaian paap sang mon.” ¹²E voxo na Aisaia a kala malaan,

“Naapalaan ri kaalum taasaxa ri taa pife taraxalie. E ri langai taasaxa ri taa vungut sena fufuna. E voxo malaan ri taa pife puk a xunus iri. Tamo ri taa puk a xunus iri a Piran i taa vil tapin a vilaana saat siri.”

Ais 6:9-10

Na Yesus A Xuus Fatexaas Nari Pana Malasuf Ina Ferawaian Paap

Mt 13:18-23; Lk 8:11-15

¹³Na Yesus a fin nari fulaa, “Nami, mi pife texaas pana ferawaian paap aanabe' e bo? Malaafaa mi taa texaas sena xasano ferawaian paap? ¹⁴A mataa aava xapis a kam ina ‘wiit’, nane xapis a ferawaian sina Piran. ¹⁵A ferawaian aava poxo lana salan a malaan sena mu rabuna aava ri texaas sena langaian taasaxa na Setan a filimaan e siak tapin a mu ferawaian aava Piran fo xapise la xunus iri. ¹⁶E saxano rabuna ri malaan sena kam ina ‘wiit’ a poxo lana xavala a toxai faat. Ri langaie e ri faxa'usie e ri faamamaas pana. ¹⁷Taasaxa ri piau ta xarei ina lamon faagut, ri taxa waan famodak mon! Lumui xasano mataa rao ri tafang a gutan siri e ri taa fakasal nari, a lalamonan roxo siri i taa pife tateak fulaa, i taa malit. ¹⁸E saxano rabuna ri malaan sena kam ina ‘wiit’ aava ri poxo lana yeis tuturuk. A mu rabuna aanabe' ri texaas sena langaian ¹⁹taasaxa ri lalamon temasaat pana mo ti la xavala e ri kanamsaat pana vubuxanaana tangop e maana mo xapiak. Ri taramangal a xasano mo. A maana buk mo aanabe' a paasan a ferawaian sina Piran e mu rabuna aanabe' ri pife vil fasavat a roxoyan. ²⁰Taasaxa saxano rabuna ri malaan sena kam ina ‘wiit’ aava poxo lana xavala roxo. Ri langai e ri tao fatateaxe. E a ferawaian sina Piran i taa fasavat a roxoyan lana toyan siri malaan sena kam ina ‘wiit’ roxo aava fuaian a kam xaves e a kam xaves paaliu.”

Xasano Ferawaian Paap

²¹E nane xuus nari, “Naak a mataa i taa timin a laam lapaana bi o lapaana ivin, bo? Piau! Nane taa timine laa'ui talo i taa lang lana lifu. ²²A so ta maana mo aava waan fufunai, lumui ri taa savat la matavas. E maana mo xafutan, lumui i taa savat la matavas. ²³Nase' ta mataa a tangana talakas i taa langai a ferawaian aanabe' e i taa masame.”

²⁴E na Yesus a xuus nari, “Ai, nami, mi taa lalamon pana ferawaian mi langaie. Tamo mi taa lalamon faagut pana, a Piran i taa tavai nami

pana masaman fexaxaas sena lalamonan simi. ²⁵Nase' ta mataa a toxan a masaman, lavaxa a masaman sina i taa savat molava sena. E nase' ta mataa piau ta masaman, a texaasan modak sina i tafe malit.”

²⁶E mui nane kuus, “A fatataganan sina Piran, i taa savat molava malaan sena saxa mataa a tapalan a kam lana uma. ²⁷La maana vung a mataa aave i taxa matef e la paanaas nane i taxa lo ti sangas. A kam aave, a boak e femolava malaafaa? Nane pife texaas. ²⁸A xavala sang mon a fapalak a mo lana uma. Paamua a paxana a savat e mui a putuna a savat e lumui a xalana a savat molava la putuna o la unguna. ²⁹E lumui layaan a xalana fo matoxol a mataa aanabe' a faisok e murule. Naboxo a yaan ina faxuvulaana fanganan a savat.”

A Ferawaian Paap Pana Mastaat

Mt 13:31-32; Lk 13:18-19

³⁰Na Yesus a sei nari, “Netaara taa kuusan famatavas a fatataganan sina Piran malaafaa talo mi taa masame? E taara taa ferawai paap malaafaa xena xalie? ³¹Nane a malaan sena saxa wai taara xalie pana mastaat. A kam ina pife malaan sena kam ina saxano wai o fanganan ti la uma, piau! A kam ina mastaat a modak paaliu. ³²Tamo mataa i taa xapise e lumui a molava, nane a peraroxo sena xasano fanganan lana uma. A raxan ina a molava e mu maanu ri maa nai xuluna senaso a lana marafut.”

³³Na Yesus a ferawai xe sina rabuna pana mu ferawaian paap malaan fexaxaas sena lalamonan siri. ³⁴Nane pife kuusan famatavas a malasuf ina ferawaian sina xe siri, piau! Nane ferawai pana mu ferawaian paap mon. E layaan a mu fefeng sang mon ri taxa waan xuvul pana, lavaxa nane kuusan xapin a fufuna maana ferawaian paap.

Na Yesus A Faluai A Taas

Mt 8:18-27; Lk 8:22-25

³⁵E leaaf lana yaan naang xo, nane xuus a mu fefeng sina malaan, “Taara taa falet xe la paxasing ina laman.” ³⁶Ri paan tapin a mu rabuna e ri xawas xuluna xaati aava na Yesus taxa waan xuluna e ri falet xuvul pana. E saxano xaati ri falet xuvul pari sait. ³⁷E a reref molava a tamasiak e a tof a laak lana xaati e fataapus a xaati febas pana raarum. ³⁸Taasaxa na Yesus si, taxa mati matef pe xuluna xaati. E ri xel fapungane e ri xuuse, “Rao taara xarak naboxo, naak no pife lamon semaam.”

³⁹E na Yesus moxo, a tamasiak e farawei a reref e taas, a kuus malaan, “Fo taxapus xong!” E fataapus a reref a taxapus e taas a luai fulaa.

⁴⁰E na Yesus a sei a mu fefeng, “Xenaso mi taxa mataut malaan? E xenaso mi piau ta namkaian tuuna?”

⁴¹E ri femataut paaliu e ri fefiaian nari xa malaan, “A mataa aanabe' ve nase!? A reref e taas re langaie!”

A Mataa Pana Vovau Saat Xaves

Mt 8:28-34; Lk 8:26-39

5 ¹E ri savat la saxa paxasing ina laman, la bina sina mu Gerasa.^e ²Na Yesus a du ti lana xaati e fataapus a saxa mataa aava toxan a vovau saat a savat sina. A mataa aanabe' fuuna taagul vulai la matana xawaa. ³Nane fuuna matef la matana xawaa e pi ta mataa a fexaxaas i taa pise. A 'sein' sait pife fexaxaas sena pisaana. ⁴Faaxaxaves ri pis a mana e kana pana 'sein' taasaxa fuuna piit a 'sein' o saxano mo ri pis fatateaxe pana. A gutan sina a molava faagut e piau ta mataa fexaxaas sena yot fatateaxe. ⁵Vulai la paanaas e lavung, nane fuuna taagul la matana xawaa e xuluna put e fuuna faati kuup e i taxa putuk vulan a tana pana fisa o pana faat.

⁶Nane xalum na Yesus i taxa sangasmaan lasuun e falapuk e fe bukaak la no Yesus. ⁷Nane ferawai faagut malaan, “Yesus, nano, no Natuna Piran Laa'ui! No vubuk vil a so sega? Ne fenung xe siim pana isina Piran, no muta tavaiau pana maasaxan!” ⁸A ferawai malaan senaso na Yesus a xuuse, “Nano, no vovau saat, no ta'ulan a mataa aanabe!”

⁹E na Yesus a fin a vovau saat aava vao a mataa aanabe', “A isaam nase!?”

E a vovau saat a sui a fiaian sina, “Na Aami, senaso nemaam, ma malila.” ¹⁰E nane nung faagutan na Yesus o i taa muta feng tapin nari, mu vovau saat, xe la xasano bina patak.

¹¹Faasilak seri a tagaan ina vio xaves ri taxa fangan xuluna fomirak put. ¹²E a mu vovau saat ri fenung faagut xe si Yesus malaan, “A fexaxaas no taa feng nemaam xe sina mu vio aapave?” ¹³E na Yesus a turoxo xe siri rao ri taa falet saa. E mu vovau saat ri ta'ulan a mataa aave e ri paan xe sina mu vio. A mu vio aanabe' moxo, ri fefalayai saa xe la talasaafan sina bina. A mu vio ri fexaxaas malaan sena 2,000! Ri lalaas du xe lana raarum e nari xapiak ri xarak e ri maat.

¹⁴A mu rabuna ina faxatangaana mu vio ri sinuf e ri fe lisan a lagasai lana bina lava faasilak e lana mu bina xapiak. E maana rabuna ri paan xe pave xena xalumaana mo aanabe'. ¹⁵Ri fesavat si Yesus e ri xalum a mataa aava mu vovau saat ri mo vawe e ri taagul xuvul pana. Naboxo i taxa falak a marapi e a lalamonan sina a matavas e i taxa nai faroxo. E a mu rabuna ri xalume e ri mataut. ¹⁶A rabuna ina faxatangaana mu vio, ri xuus a xasano rabuna pana mo aava fo savat sena mataa aava mu vovau saat mo waan la tana paamua. E ri kuusan a mu vio siri sait. ¹⁷A mu

^e 5:1 Na Luuk a xali a rabuna ti la bina aanabe' pana Gerasin (Lk 8:26,37) e na Matiu a xali nari pana Gadarin (Mt 8:28)

rabuna, ri kuus faagut rao na Yesus i taa ta'ulan a bina siri e i taa paan xe la saxa nobina patak.

¹⁸Layaan na Yesus i taxa xawas fulaa xuluna xaati a mataa aava vovau saat mo waan la tana, a fin na Yesus rao i taa falet xuvul pana. ¹⁹Taasaxa na Yesus a pife kuus turoxo pana, a xuuse, “No paan saa xe la lifu siim e xe sina mu fesing siim. E no xuus nari pana maana mo a Memai fo vile sema e malaafaa a muluk nano.” ²⁰Lavaxa, a mataa aanabe' a falet e taxa kuusan fasavat a mo na Yesus fo vesane sena la maana mu bina pe Dekapolis. E mu rabuna, ri ipul faagut pana e ri lamon faaxaves sena.

A Lak Si Jairus E Saxa Tefin Pana Giisan

Mt 9:18-26; Lk 8:41-56

²¹Na Yesus a ulaa fulaa xe pe la saxa paxasing ina Laman Galili. E a malila ri savat xe sina pe la vangana raarum. ²²E saxa matalava ti la lifu ina faxavulan a savat, a isina na Jairus. Nane xalum na Yesus e filimaan e maa bukaak faasilak la ka Yesus. ²³E nane fenung faagut xe si Yesus malaan, “A lak tefin siak faasilak rao i maat. Ne vubuk o no taa falet e no taa tao a tana talo i taa roxo fulaa.” ²⁴Na Yesus a falet xuvul pana e a malila ri usie e ri ivung faasilak paaliu lamina.

²⁵A saxa tefin la palou ina malila aanabe', nane a xaxalum a fulun vulai la maana yaan. Nane fo toxan a giisan aanabe' pana mariaas sangafilu saxa pana taragua. ²⁶E mu rabuna i'irin ri famasaxe pana maana buk irin xaves e a tefin a maraan nari pana tangop xapiak sina taasaxa giisan sina pife taxapus famodak, piau paaliu! ²⁷A tefin aanabe' a langai sena faisok si Yesus e nane fe laak la palou ina rabuna aava ri taxa usi na Yesus e nane sangas faasilak lumui la mi Yesus e a tao a marapi sina. ²⁸Senaso a ilisai malaan, “Naak tamo ne taa tao a marapi sina mon ne taa roxo fa'ulaa.” ²⁹Lavaxa, nane vil malaane e fataapus paaliu a ria la tana a pagala e nane nasam a giisan ti la tana fo taxapus paaliu.

³⁰E na Yesus a texaas o saxano gutan fo falet, e voxo nane ti tapuk e fi ai, “Nase' tao a marapi siak?”

³¹E a mu fefeng si Yesus ri sui a fiaian sina malaan, “Ai, no xalum a malila ri taxa pitai xolai la taam e xenaso no fi ai malaan: nase' tao a marapi la taam?”

³²Na Yesus a kaalum xolai e a vubuk texaas o nase' fo tao a marapi sina. ³³Taasaxa, a tefin aave nane texaas o nane fo vil a mo aanabe' e a mataut e radakui faagut. E nane falet e fe bukaak la ka Yesus e kuusan xapin a maana mo nane fo vile. ³⁴E na Yesus a xuuse, “Lak siak, a namkaian siim fo vil faroxoi nano. No taa falet e a xunus ima i taa malui, a giisan siim fo taxapus!”

³⁵Na Yesus i taxa ferawai lunai e saxanu sisiak sina matalava ina lifu ina faxavulan aave ri savat e ri xuus a matalava, “A lak siim fo maat xong, xenaso no taxa lo fisorak a mataa ina fepitaa aanabe'?”

³⁶Taasaxa na Yesus fo texaas sena so ta mo ri kuusane. Nane a xuus a matalava ina lifu ina faxuvulan malaanabe!, “No muta mataut naboxo. No taa namkai mon.”

³⁷E na Yesus a ti votan a xasano rabuna ri taa pife paan xuvul pare. Na Saimon Pita, Jems e na Jon a saxa ti Jems, narutul sang mon rutul usi na Yesus. ³⁸E ri fe savat la lifu sina matalava aave e na Yesus a xalum nari pave, ri taxa felingai faagut senaso ri taxa fetangiis. ³⁹E na Yesus a laak la lifu e fin nari, “Senasou mi felingai faagut pana taangiisan simi? A lak aanabe! pife maat paaliu. Nane taxa matef move.” ⁴⁰E mu rabuna ri fenangon xuluna. Taasaxa nane feng tapin nari xe lamalei.

E nane xel mon a tamana lak e ninana o re taa laak xuvul pana e a fefeng talatul sina. E ri laak xe la nobina aava lak taxa mati lana. ⁴¹E na Yesus a tao a mana lak e xuuse malaan, “Talita Kum!” A malasuf ina paferawaian aanabe! a malaan, “Lak tefin, ne xuus nano, no tamasiak!” ⁴²E fataapus a lak tefin aanabe! a tamasiak e sangas. A mariaas sina lak a sangafilu saxa pana taragua. E na ninana e tamana e fefeng talatul sina ri ipul faagut paaliu sena gutan si Yesus. ⁴³E na Yesus a xuus faagutan nare o re muta xuus ta saxa mataa pana mo aanabe!. E nane xuus nare sait o re taa tavai a lak pana fanganan.

A Vilaana Sina Mu Rabuna Ti La Fufubina Si Yesus

Mt 13:53-58

6 ¹E nane ta'ulan a bina aapave e falet xe Nasaret, a bina sina e mu fefeng sina ri usie. ²Layaan a Yaan ina Fangaafusan a savat, nane laak lana lifu ina faxuvulan e i taxa fapiti a mu rabuna pave e ri ipul sena e ri kuus, “A siak a texaasan sina ti faa? A so ta masaman nabe!? Nane nase! e a toxan a gutan molava xena vilaana maana mo fa'ipul malaan? ³Nane a mataa ina faisok mon, bo? A lak si Maria? A mu tina va na Jems, Yosep, Juut e na Simon, ri taxa waan xuvul pataara, bo? E mu vasaana sait, a sou ri pife waan la palou itaara?” E voxo ri marala pana.

⁴E na Yesus a xuus nari, “A rabuna ti lasuun ri taa suaian a mataa aava i taxa xuus nari pana ferawaian sina Piran. Taasaxa rabuna ti la bina sina e mu tauna sait, ri taa pife suaiane.” ⁵E nane fexaxaas sena tao faroxoiaana saxanu rabuna mon, pife xaves. A mu rabuna ti Nasaret, ri langai pesalai sina e nane pife fexaxaas sena vil a mo ina gutan pave. ⁶Nane ipul senaso a rabuna pave ri pife toxan a namkaian e voxo nane falet xe la xasano bina patak xena fepitaa.

Na Yesus A Tavai A Mu Yaamut Sina Pana Gutan

Mt 10:1,5-16; Lk 9:1-6

⁷E nane xel faxuvul a mu yaamut sangafilu saxa pana taragua e feng nari o ri taa falet taragua pa taragua. E nane tavai nari pana gutan

xena gei tapin a mu vovau saat. ⁸E nane xuus fatexaas nari o ri muta siak ta fanganan, bi o faat xena sangasan siri. Ri taa siak a wai ina xipa sang mon. ⁹E a fexaxaas ri taa siak a 'sliapa' siri taasaxa piau ta xuxulan taragua. ¹⁰E nane xuus nari sait, "Layaan a saxa mataa i taa tavai name pana nobina xena taagul, me taa taagul pave fefexaxaas sena yaan me taa falet xe la xasano bina fulaa. ¹¹E tamo mu rabuna ti la saxano bina ri taa pife suaian name o taa langai pesalai seme, me taa ta'ulan a bina aave e layaan me taa falet me taa saf tapin a pof ti xuluna kame. Senaso a pof aave i taa fakalimaan o vilaana saat siri taxa waan lunai."

¹²E nari xapiak ri falet e ri fasei a mu rabuna o ri taa puk a xunus iri e ta'ulan a vilaana saat siri. ¹³E a mu yaamut ri gei tapin a mu vovau saat sina malila e ri noxol a rabuna aava ri giis e ri savat faroxo fulaa.

A Punuxaan Na Jon

Mt 14:1-12; Lk 9:7-9

¹⁴Na King Herot a langai sena faisok si Yesus senaso a saxanu tuvaat ri kuusan malaane, "Na Jon ina Fasufan fo to fa'ulaa. A savat fulaa ti la mamaat e voxo a gutan ina vesanaana maana mo fa'ipul taxa waan sina!"

¹⁵E xasano rabuna taxa kuus malaan: "Na Ilaija xo!" E xasanofuna ri kuus, "Piau, a saxa mataa ina kuus fatuxai xo! Malaan sena mu rabuna ina kuus fatuxai ti kavai!"

¹⁶Taasaxa layaan na Herot a langai pana faisok si Yesus nane taxa lo kuus, "Na Jon xo! Ne fo patal tapin a putuna taasaxa to fa'ulaa ti la mamaat."

¹⁷Senaso paamua na Herot a feng a rawen sina e ri fo pis na Jon. Nane a vil malaane senaso na naasana, na Herodias, a toxaan a marala se Jon. Paamua na Herodias a tefin si Filip, a ti Herot. ¹⁸E na Jon fo xuus na Herot, "Ai, no taxa vil a vilaana saat ve. Pife roxo no taa tamai si naasa tiam." Senaso na Filip taxa to lunai. ¹⁹E na Herodias a xaiyaasaan na Jon e nane vubuk rao i taa punuxe taasaxa nane pife fexaxaas ²⁰senaso na Herot a mataut se Jon. Nane texaas o na Jon a mataa roxo e a mataa sina Piran e voxo nane tao fatateaxe lana vipis e vaxa na Herot a vubuk langai a ferawaian sina, taasaxa saxano ferawaian sina nane vungut sena malasuf ina.

²¹E saxa yaan a savat, a yaan lava si Herot, a yaan ina luluuxan sina. E na Herot a vil a fenamo xana mu matalava sina: mu rabuna fefasaa, mu rabuna ina paamuian a mu rawen e mu matalava ti Galili, nari xapiak, ri savat. ²²E a lak tefin si Herodias a filimaan e taxa tia la matana rabuna e ri nanam temasaat pana tian sina.

E na Herot a xuuse, "Finau pana a so ta vubuxanan siim e nenia, ne taa tavai nano pana!" ²³E na Herot a kuus fakalimaan, "A so ta mo no taa nungau pana fexaxaas sena xavil molava ina xavala siak, ne taa tavai nano pana!"

²⁴E a lak tefin si Herodias a falet e fin na ninana, “Ne taa nung na Herot panaso?”

E na Herodias a xuuse, “Fiai pana putu Jon, a mataa ina fasufan.”

²⁵E a lak tefin a fala xe si Herot e nunge malaan, “Ne vubuk o no taa tavaiau, monabe' mon, pana putu Jon, a mataa ina fasufan. Lisanmaane lana ‘plet’.”

²⁶Na Herot a mimilisaat paalii pana fiaian sina lak taasaxa nane fo fakalimaan o i taa vil a vubuxanan sina e a mu rabuna si Herot sait, ri fo langai a ferawaian sina e voxo nane kuus turoxo pana. ²⁷E fataapus na Herot a feng a mataa i taa fe patal tapin a putu Jon e i taa lisanmaane. E voxo a mataa a falet e fe punuxe lana lifu ina vipisan ²⁸e lisan a putu Jon lana ‘plet’ e tavai a lak tefin pana. Mui a lak tefin a tavai na ninana, na Herodias, pana. ²⁹Layaan a mu fefeng si Jon ri langai sena, ri falet xe si Herot xena siak a vipin si Jon. Ri siaxe e ri fe xaafane lana liing.

Fafanganaana Mu Rabuna 5,000

Mt 14:13-21; Lk 9:10-17; Jn 6:5-13; Mt 8:2-9

³⁰E a mu yaamut aava na Yesus a feng nari taragua pa taragua, ri maa savat fa'ulaa si Yesus e ri kuusan a maana mo ri fo vile e a maana mo ri fo fepitaa pana. ³¹E nane a xuus nari, “Filimaan xuvul paga xe la bina vingil xena maagus famodak.” Nane kuus malaan senaso a malila ri taxa lo savat vulai e a mu yaamut ri piau ta yaan ina fanganan e maagusan.

³²E voxo nari xapiak, ri xawas xuluna xaati e ri falet xe la xasa bina xobingil. ³³Taasaxa saxano rabuna ri xalum taraxali nari xuluna xaati e voxo a malila ti la maana nu bina pave ri fala paamuin nari e ri fe savat paamua seri. ³⁴Layaan na Yesus a ung nane xalum a tang malila aanabe' e a vilauna a muluk nari senaso ri piau ta mataa xena paamuianaan nari. Ri taxa milung malaan sena sipsip aava piau ta mataa xena faxatangaan nari. E voxo nane fapiti nari fulaa pana maana mo xaves.

³⁵E faasilak naboxo a ngaas taa rul e a mu fefeng sina ri xuuse, “Ai, a bina aanabe' ve a vingil e faasilak i taa suk, ³⁶feng tapin et nari talo ri taa paan saa xe la saxano bina aava toxai fanganan xena mamareiai.”

³⁷Taasaxa nane sui a mu fefeng sina e kuus, “Nami, mi taa tavai nari pana fanganan.”

E ri fine, “Bo? A mataa taa faisok pana fulun pisiktul xena faxuvul a faat fexaxaas sena maraan a bret xari. Taara taa fe tapin a faat malaan xena maraan bret a fexaxaas sena malila aanabe'?”

³⁸E nane xuus nari, “Fe kaalum, mi toxan a bret talavisan taxa waan?”

E ri fe fakate e ri suie, “A bret pama e fomirak din taragua taxa waan.”

³⁹Na Yesus a xuus a malila o ri taa nai faxuvul lapia. ⁴⁰E voxo ri nai lana maana xoxovulaian. ⁴¹E nane siak a bret pama e din taragua e nane kaalum xe laa'ui la xunavata e fenung pana fanganan. Nane viak a bret

e taxa lo tavai a mu fefeng pana xena fepatoxanaana xe sina rabuna. E a viak tavai nari pana ro din sait. ⁴²A maana mu rabuna xapiak, ri fangan e ri maasi. ⁴³E mu fefeng ri tifi a bi sangafilu saxa pana taragua pana xavil ina fanganan. ⁴⁴E a rabuna tomexaan aava ri fangan a fexaxaas sena 5,000.

Na Yesus A Sangas Xuluna Laman

Mt 14:22-32; Jn 6:15-21

⁴⁵E fataapus na Yesus a faxawas a mu fefeng xuluna xaati e feng nari xe la paxasing ina Laman Galili, xe la saxa bina Betsaida. La yaan aave, nane sang mon a feng fa'uli a rabuna. ⁴⁶Layaan a mu rabuna fo falet nane laak xe xuluna put xena fenung xe sina Piran.

⁴⁷A bina xo suk e a mu fefeng aave ri taxa falet xuluna xaati la palou ina Laman Galili. E na Yesus ve, i taxa waan pe xuluna put. ⁴⁸E nane xalum nari, ri taxa xaul faagut pana fos senaso a reref a fiit faagut. La xunavung nane filimaan faasilak la tari e taxa sangas xuluna laman e ri kuup i taa paaliu nari. ⁴⁹Taasaxa ri xalume taxa sangas xuluna laman e ri kuup faagut senaso ri lamon o a rongan. ⁵⁰Nari xapiak ri xalume e ri mataut.

E fataapus nane ferawai xe siri, a kuus malaan, “Muta mataut; nenia move.” ⁵¹E nane xawas xuluna xaati siri e a reref a taxapus. E nari, ri ipul paaliu sena gutan sina. ⁵²Ri fo mo xalum a faisok sina pana viak tavaiaana malila pana fanganan taasaxa ri pife lamon faroxo sena.

A Gutan Si Yesus Xena Vil Faroxoi A Rabuna

Mt 14:34-36

⁵³E nari, ri falet xuluna xaati xe la bina Genasaret e ri ung e pis fatateak a xaati pave. ⁵⁴Layaan a mu rabuna ri xalum taraxali na Yesus ⁵⁵ri falet xe la maana nu bina faasilak e ri fe xuus a mu rabuna e ri xelmaan nari aava ri giis xe si Yesus. ⁵⁶E la maana yaan layaan nane savat la saxa bina, modak o molava, a mu rabuna pave ri fuuna xel faxuvul a mu rabuna pana giisan xe la bina ina faasot e ri fe nung na Yesus rao a rabuna giis ri taa tao mon a marapi sina. E nase' ta mataa i taa tawe a giisan sina i taa taxapus e i taa roxo fulaa.

A Fepitaian Sina Mu Ferasi

Mt 15:1-20

7 ¹E saxa nutuvaat Ferasi e saxano mataa aava ri fepitaa pana vuputkai si Moses, ri filimaan ti Jerusalem e ri maa savat si Yesus. ²E ri xalum a saxano fefeng si Yesus ri taxa fangan pana mari vusiit senaso ri pife xamak a mari paamuina fanganan. ³A mu Ferasi e maana xasano Juda ri taa pife fangan tamo a raarum xena xamaxaana mari pife waan. A mu buri ti kavai ri fapiti nari o layaan ri pife xamak a mari a lalosaat taa waan

la toyan siri e voxo ri taxa usi a vilaana malaan. ⁴E layaan ri filimaan ti la bina ina maraan fanganan ri pife fexaxaas sena fangan tamo ri pife xamak a mari. E maana vilaana aava ri langaie sina mu buri, ri faxa'usie, malaan sena gonaana 'kaap' e xamaxaana mu 'dis' o 'sospen' siri.

⁵E a mu Ferasi aave ri maa savat si Yesus e ri fine, "Senasou a mu fefeng siim ri pife usi a vilaana ti kavai e ri taxa lo fangan pana mari aava vusiit?"

⁶E na Yesus a sui a fiaian siri, "A tuuna paaliu ne xuus nami, na Aisaia fo xalei a maana bitan sina mu butaara e nami vaxa mi mu rabuna ina bitan malaan seri. Na Aisaia a xalei a ferawaian sina Piran malaan:

'A rabuna aanabe' ri suai sega pana ferawaian siri taasaxa
lamonan siri a patak paaliu. ⁷A tuuna, ri fenung taasaxa ri
fenungmaat. Ri taxa fepitaa pana vilaana sina mataa mon, ri
pife usi a lalamonan siak." *Ais 29:13*

⁸Na Yesus a sei nari, "Nami, mi langai pesalai sena ferawaian tateak sina Piran e mi usi a vilaana sina rabuna mon!"

⁹E nane kuus fulaa, "Mi texaas faagut tuuna pana vilaana ina vil tapin a ferawaian sina Piran xena usi a lalamonan simi. ¹⁰Na Moses a kuus malaanabe', 'Suai se tamaam e ninaam' e fulaa, 'Nase' ta mataa i taa kuus fasaat se ninana o tamana, lavaxa a mataa aave a mu rabuna ri taa soxoi punuxe pana faat.' ¹¹Taasaxa nami, mi kuus malaan, "Tamo ta mataa taa xuus na ninana o tamana malaan "Ai, a maana mo siak ne fo tavai a Piran pana, ne pife fexaxaas xena xavang name. A maana mo xapiak siak a koban." (A malasuf ina vapaling 'koban' a malaan: a maana mo ri fo faatataap pana.) ¹²E nami, mi ti votan a mataa aava kuus malaan: nane taxa rawetan na ninana o tamana. ¹³E voxo mi vil tapin a ferawaian tateak sina Piran e mi usi a lalamonan simi e vilaana sina rabuna ti kavai. E a buk vilaana saat malaanabe' a pife saxa mon!"

¹⁴E na Yesus a xel a mu rabuna e nane xuus nari, "Mi langaiu! Langai nabe' e mi taa masam! ¹⁵Piau ta mo i taa laak lana mataa i taa vil falalosaate, piau! Taasaxa maana mo a mataa taa vile, a maana mo aanabe' ri falalosaat a mataa. ¹⁶Langaiu e lamon pana ferawaian siak!"

A Mu Fefeng Ri Fiai Sena Vilaana Saat

¹⁷Layaan na Yesus a ta'ulan a mu rabuna nane laak lana lifu e mu fefeng ri fine pana ferawaian paap sina. ¹⁸E nane xuus nari, "Nami sait, mi vungut sena malasuf ina ferawaian aanabe'? Nami, mi pife masam o a mo aava i taa laak la valana mataa, tamo i taa ngane, a pife fexaxaas sena vil falalosaat a mataa. ¹⁹Senaso a mo aava nane taa ngane, a sivi la vilau ina e nane taa pesane." (Pana ferawaian aanabe' na Yesus a vil tapin a faati votaian xuluna saxano fanganan aava mu Juda ri pife fexaxaas sena ngane.)

²⁰E nane kuus fulaa, “A mo aava i taa savatmaan ti la lamonan sina mataa ve, i taa kawaasan a naian sina. ²¹Senaso ti lana mataa, ti lana lalamonan sina e lana xunus ina a vilaana saat a sasavat. A vilaana saat malaan sena fenauan, paruxan, punuk mataa, siaxan a tefin sina xasa mataa, ²²naixaaman, saatan e fasaamaatan, piilaana saxa mataa, lamon falavaiaan nano e pife kuus fati a isina Piran. ²³A maana mo malaan a savat ti lana mataa e kawaasan a vilaana sina.”

Na Yesus A Xavang A Saxa Tefin Ti Tair

Mt 15:21-28

²⁴Na Yesus a tamasiak xuvul pana mu fefeng sina e ri falet xe kol lana nu bina faasilak Tair. Layaan ri laak lana lifu pave nane baian a mu rabuna taa texaas o nane taxa waan. Taasaxa nane pife fexaxaas sena fufunai. ²⁵Saxa tefin a langai sena e fataapus a filimaan e maa bukaak la no Yesus senaso a lak tefin sina a toxan a vovau saat. ²⁶E a tefin aave a pife Juda, a fufubina sina pe Fonisia pe Siria. E nane xo taxa lo fin na Yesus pana vil faroxoiaana lak tefin sina.

²⁷E na Yesus a xuus nane pana ferawaian paap, “Maam pife siak a fanganan sina mu rafulak e tavai a mu piu pana. A roxo sena mu rafulak taa fangan maasi paamua.”

²⁸Taasaxa a tefin a sui a ferawaian sina malaan, “Ai, Matalava, no kuus tuuna taasaxa layaan a rafulak ri taxa fangan, a mu piu aave ri taxa waan faasilak e ri piak a xavil ina fanganan i taxa lo poxo.”

²⁹E na Yesus a xuuse, “Tefin no sui faroxoi a ferawaian siak e voxo a fenungan siim fo fexaxaas. A lak siim fo roxo fulaa xo. A vovau saat fo ta'ulane.”

³⁰E a tefin a ulaa fataapus xe la lifu sina e tingin a lak tefin sina i taxa mati xuluna ivin e a vovau saat fo paan sena.

A Mataa Aava Vaang E Po

Mt 15:29-31

³¹E mui na Yesus e mu fefeng sina, ri sivi xe puua la saxa bina Saidan e ri falet ulaa xe la Laman Galili, xe la mu bina Dekapolis. ³²E saxano rabuna, ri lisan a saxa mataa aava vaang xe sina. A mataa vaang aanabe' pife fexaxaas sena ferawai faroxo sait. E ri fenungan xe si Yesus rao i taa timin a mana xuluna putuna talo i taa roxo.

³³Na Yesus a sangas tapin a malila xuvul pana mataa vaang. E nane timin a vipirigum ina mana la tangana mataa aave. E na Yesus a kaanus xe la mana e tao a xalemana mataa pana. ³⁴E nane kaalum xe laa'ui la xunavata e maagus e kuus, “Efefaata!” (A malasuf ina: talakas) ³⁵A tangana mataa a matavas e xalemana pife pasak fulaa. E a mataa aanabe' a fexaxaas sena ferawai faroxo.

³⁶Na Yesus a ferawai faagut xe siri xapiak o ri taa muneta xuus fatexaas a mu rabuna pana. Taasaxa la maana yaan nane taxa lo xuus votan nari, ri taxa lo kuusan fasavat a faisok sina. ³⁷E a mu rabuna aava ri langai sena, ri ipul paaliu e ri kuus malaan, “A mataa aanabe' a vil faroxoi a maana faisok xapiak sina. Nane fexaxaas xena fatalakasaana tangana mataa e vil faferawai a mataa po.”

A Fanganan Xana Rabuna 4,000

Mt 15:32-39

8 ¹La saxa yaan fulaa a malila ri savat xe si Yesus e ri piau ta fanganan. E voxo nane xel a mu fefeng sina e a xuus nari malaan, ²“Ne muluk a malila aanabe' senaso ri fo waan xuvul paga pana yaan talatul e naboxo ri piau ta fanganan. ³Tamo ne taa feng fa'uli nari xe la mu lifu siri ri taa giis pana lagaian senaso saxano rabuna ri filimaan ti lasuun paaliu.”

⁴A mu fefeng sina ri fine malaan, “A bina aanabe' a bina vingil. Maam taa maraan a bret faa xena famasiaana malila aanabe'?”

⁵E nane fin nari, “Mi toxan a bret talavisan?”

E ri xuuse, “A pisiguak.”

⁶Nane xuus a malila o ri taa nai lapia. E nane siak a bret pisiguak e fenung xe laa'ui pana e viaxe. E mui a lisane xe sina mu fefeng sina xena tavaiaana malila pana. ⁷Ri toxan a xasanu miraxan a din sait e na Yesus a fenung pana nu din e mui a xuus a mu fefeng rao ri taa tavai a mu rabuna pana sait. ⁸E a malila ri fangan e ri maasi. Lamina fanganan a toxan a fanganan a soliu taxa waan e voxo a mu fefeng ri tifi a bi molava pisiguak pana mu xavil ina. ⁹E a malila aava ri fo fangan ri fexaxaas sena 4,000. E na Yesus a feng fa'uli nari.

A Fepialaian Xuvul Pana Mu Ferasi

Mt 16:1-12

¹⁰E nane xawas xuluna xaati fulaa xuvul pana mu fefeng sina e ri falet xe la nobina Dalmanuta.

¹¹E saxano Ferasi ri savat xena fepialai xuvul pana senaso ri vubuk rao i taa fa'ipul nari pana saxano vilaana xena fakalimaan a gutan sina Piran. Ri fo filimaan xena tafangaana. ¹²E nane a maagus faagut la vilau ina e kuus malaan, “Xenaso a mu rabuna malaan se' mi vubuk seng a fakalimaan? Ne kuus tuuna paaliu o piau ta fakalimaan i taa savat xe simi.” ¹³E nane ta'ulan nari e xawas xuluna xaati e ri fe paan fulaa xe la saxa paxasing ina Laman Galili.

Na Yesus A Fa'isin A Lalamonan Saat Pana Yiis

¹⁴E a mu fefeng lana xaati xo, ri lamamaaluf paaliu pana maraan bret. Ri toxan a bret saxa mon lana xaati. ¹⁵E na Yesus a xuus nari, “Mi taa faxatang faroxo pana yiis sina mu Ferasi e sina nutuvaat si Herot.”

¹⁶E nari, ri fefiai la palou iri o ri piau ta bret.

¹⁷E na Yesus a texaas sena ferawaian siri e nane fin nari, “Xenaso mi ferawai o mi piau ta bret? Mi piau paaliu ta texaasan e piau paaliu ta masaman lunai? A lalamonan simi a vungut paaliu sait malaan sena mu Ferasi? ¹⁸A saxa mataa ina kuus fatuxai ti kavai fo kuus malaan:

‘Mi toxan a mata taasaxa mi pife xakaalum! Mi toxan a tanga taasaxa mi pife langai!’

Isi 12:2

Mi fo lamamaaluf? ¹⁹Layaan ne viak a bret pama xana rabuna 5,000, mi tifi a maana xavil lana bi talavisan?”

E ri xuuse, “A bi sangafilu saxa pana taragua!”

²⁰“E layaan ne viak a bret pisiguak xana rabuna 4,000 mi faxuvule e mi tifi a bi molava talavisan?”

E ri xuuse, “A pisiguak.”

²¹E nane fin nari fulaa, “E vaxa mi taxa lo vungut lunai, bo?”

Saxa Mataa Aava Piif

²²E ri falet e ri ung la saxa bina, a isina na Betsaida. E mu rabuna pave, ri maa lisan a saxa mataa piif xe si Yesus e ri fenung xe sina rao i taa vil faroxoie. ²³Nane tao a mana mataa piif e re falet lasuun famodak sena bina. Nane kaanus xe la matana mataa piif e tao a putuna e fine, “No xalum ta mo vaxa? A so ta mo no xalume?”

²⁴E a mataa a kaalum xolai e sui a fiaian sina, “Ne xalum a rabuna taasaxa ri kaalum malaan sena mu wai aava taxa sangas xolai.”

²⁵E na Yesus a tao a matana fulaa e a mataa fexaxaas sena kaalum faroxo. A xakaaluman sina a roxo fulaa e matavas xe lasuun paaliu sait. ²⁶E na Yesus a feng a mataa aave xe la bina sina e xuuse, “Muta ulaa xe la bina aamove.”

Na Yesus Narie Saimon Pita

Mt 16:13-16; Lk 9:18-20; Mt 16:21-28; Lk 9:22-27

²⁷Na Yesus e mu fefeng sina ri falet xe la maana nu bina faasilak se Sesaria Filipai. La fena sangasan siri nane fin nari malaan, “A mu rabuna ri lamon malaafaa sega?”

²⁸E ri xuus fatexaas nane, “Saxano rabuna ri kuus o nano, na Jon ina Fasufan aava to fulaa. E xasanofuna ri kuus o nano, na Ilaija e xasanofuna ri kuus o no malaan sena saxa mataa ina kuus fatuxai ti kavai.”

²⁹E nane fin fulan nari, “E nami xa, mi lamon malaafaa sega? Nenia nase!?”

E na Pita a sui a fiaian sina malaan, “Nano, no Mataa Failai sina Piran, na Kraisi!”

³⁰E na Yesus a pebukan nari o ri muneta kuus famatavas pana isina lunai. ³¹E nane tangpat pana fapiti nari o a Natuna Mataa taa yaas a

maana maasaxan: a mu rabuna taa bilai fasaat xe sina e mu paamua sina mu Juda e mu matalava siri ri taa gigirane e ri taa punuxe. Taasaxa lamina yaan talatul i taa tamasiak fulaa ti la maatan. ³²E nane xuus famatavas nari. Taasaxa na Pita a xeke xe la xasing e a ferawai xuvul pana, narie sang mon. Na Pita a baiian a ferawaian si Yesus e a barase pana.

³³Taasaxa na Yesus a ti tapuk e xalum a xasano fefeng sina e baras na Pita malaan, “Setan, no paan patak. Pita, a xunus ima pife usi a vilaana sina Piran. A lalamonan siim a malaan sena mataa palau mon!”

³⁴E nane xel faxuvul a malila xuvul pana mu fefeng sina e nane xuus nari, “Nase' ta mataa rao i usiau i taa ta'ulan a maana mo sina e i taa yaas a maasaxan sina e i taa usiau. ³⁵Senaso nase' ta mataa rao i tao fatateak a toyan sina, a toyan sina i taa malit. E nase' ta mataa aava i taa punuxan sega o sena Lagasai Roxo sina Piran, a toyan sina i taa waan vulai. ³⁶A so ta roxoyan a mataa i taa toxane tamo nane taa toxan a maana mo xapiak nabe' lapia la xavala e a vovau ina i taa malit? Naak pife roxo malaan! ³⁷A so ta mo nabe' lapia a fexaxaas xena maraan fa'uli a vovau ina mataa? Piau ta mo fexaxaas sena. ³⁸Nase' ta mataa i taa mangil sega o sena ferawaian siak tanin la palou ina mu rabuna xaves aava ri taxa usi a vilaana saat, lavaxa mui a Natuna Piran i taa mangil sena layaan i taa savat pana malang molava sina Piran la palou ina mu angelo.”

9 ¹E nane xuus nari, “Ne xuus tuunei nami, saxano rabuna aava ri taxa tigina la palou itaara tanin, ri taa pife maat lunai layaan a fatatanganan sina Piran taa savat pana gutan.”

A Xakaaluman I Yesus A Puk

Mt 17:1-13; Lk 9:28-36

²Lamina yaan pisaxa na Yesus a xel na Pita, Jems e na Jon. E narutul sang mon rutul fe laak xuvul pana xe laa'ui xuluna put lava e a xakaaluman ina fepuk la matarutul. ³A marapi sina a savat pasak paaliu e a rarapak faagut. Piau ta mataa fexaxaas sena ruk fararapak a marapi malaan. ⁴E na Ilaija, saxa matalava ina kuus fatuxai ti kavai xuvul pa Moses aava paamua lava sina mu Juda, re savat si Yesus e rutul taxa ferawai.

⁵E na Pita a xukulai, “Ai Memai, nemaatul taxa waan, a roxo naak maatul taa vesan a sawat talatul xamutul; saxa xaanum, saxa xa Ilaija e saxa xa Moses.” ⁶Nane xukulai malaan senaso rutul mataut paaliu e rutul pife texaas o rutul taa kuus panaso.

⁷E mui a vata a savat xuluri e a ling a ferawai ti lana vata, a kuus malaan, “Nabe' ve a Lak Siak! Mi taa langai sina.”

⁸E rutul kaalum xolai e piau ta saxa mataa fulaa taxa waan. Na Yesus sang mon taxa tigina.

⁹Layaan ri taxa sivi ti laa'ui xuluna put nane xuus faagutan narutul o rutul taa pife kuusan xolan a mo rutul fo xalume fefexaxaas sena yaan a Natuna Mataa i taa to fa'ulaa ti la maatan. ¹⁰E voxo rutul usi a vubuxanan sina taasaxa la palou irutul, rutul taxa lo ferawai pana malasuf ina 'to fa'ulaa ti la maatan.'

¹¹E mui rutul fine pana saxa mo, rutul kuus malaan, "Senasou a rabuna aava ri masam sena xakalayan ti kavai, ri kuus o na Ilaija i taa savat paamuin a Mataa Failai sina Piran?"

¹²E nane xuus narutul, "Na Ilaija i taa savat paamua xena faigotan a vepen sina Mataa Failai. Taasaxa a xakalayan sena Natuna Mataa a kuus sait o a mu rabuna ri taa vil pengane e ri taa pife suai sena. Mutul lamon malaafaa pana ferawaian aanabe!? ¹³Taasaxa, ne xuus nami na Ilaija fo savat xong e a mu rabuna ri fo bilai fasaat xe sina malaan sena xakalayan ti kavai fo kuus." (Nane taxa ferawai se Jon ina Fasufan.)

A Lak Tomexaan Aava Po

Mt 7:14-23; Lk 9:37-45

¹⁴Layaan ri savat fulaa pe sina xasano fefeng, a malila taxa waan fakaliuan nari e saxano rabuna aava ri masam pana vuputkai si Moses ri taxa fetok xuvul pari. ¹⁵Layaan a malila aave ri xalum na Yesus ri ipul marasaxa e ri fala fataapus xe sina xena fasusuie.

¹⁶E nane fin a mu fefeng sina, "Mi taxa fetoxan a so?"

¹⁷A saxa mataa ti lana malila a sui a fiaian sina, "Mataa ina Fepitaa, ne lisanmaan a lak siak xe siim. A vovau saat a vawe e nane pife fexaxaas sena ferawai. ¹⁸E saxano yaan a vovau saat i taa tapine xe lapia e a vuvusen fuuna savat ti la valana e a faxakengat a fana e tana tateak saxa. E ne nung a mu fefeng siim o ri taa vil tapin a vovau saat aave taasaxa ri pife fexaxaas."

¹⁹E na Yesus a xuus a mu rabuna malaan, "Nami xapiak, mi taxa lo vungut lunai! Ne taa taagul xuvul pami pana yaan talavisan? Ne taa fapiti nami malaafaa? Siakmaan a lak xe siak!"

²⁰E ri lisan a lak xe sina e layaan nane xalum na Yesus nane poxo marasaxa xe lapia e radakui faagut e sapul xolai e a vuvusen a savat ti la valana.

²¹E na Yesus a fin na tamana, "A mariaas talavisan a mo aanabe! taxa lo savat?"

E tamana lak a sui a fiaian sina, "A savat la modaxan sina xa.

²²Faaxaves fo tapin falaxe xe lana fata e xe lana raarum xena punuxe. Tamo no fexaxaas sena xavang nemaam lavaxa, muluk nemaam e no xavang nemaam monaboxo."

²³E na Yesus a xuuse, "Piau, nano fatak no fexaxaas! A mataa pana namkaian tateak a fexaxaas sena vil a maana mo xapiak."

²⁴E tamana lak a xukulai faagut e kuus malaan, “A namkaian siak i taa tateak tamo no taa xavangau.”

²⁵Na Yesus a xalum a malila ri taxa faxuvul fataapus maan e nane baras a vovau saat aava vao a lak aave, a kuus malaan, “Nano, no vovau po e vaang, ne xuus nano, no ta'ulan a lak aanabe' e muneta vawe fulaa.”

²⁶E a vovau saat a xukulai faagut e vil faradaku i faagutan a lak e a ta'ulane. E a lak xo, a mati malaan sena fo maat. E a rabuna xaves ri kuus o fo maat xo. ²⁷Taasaxa na Yesus a siak a mana e yuuf fatigineie e nane tigina faroxo fulaa.

²⁸Mui layaan na Yesus a laak lana lifu, a mu fefeng ri fine, “Senasou maam pife fexaxaas sena gei tapin a vovau saat aave?”

²⁹Nane sui a fiaian siri, “A fenungan sang mon a fexaxaas sena gei tapin a buk vovau saat malaanabe'.”

Na Yesus A Ferawai Fulaa Pana Maatan Sina

³⁰E nari, ri ta'ulan a bina pave e ri sangas xe pe Galili taasaxa na Yesus a baian a malila ri taa usie ³¹senaso nane vubuk fapiti a mu fefeng sina. Nane xuus nari malaan, “A Natuna Mataa xo, i taa pet lisanan e a rabuna ri taa punuxe e i taa waan la bina ina maatan fefexaxaas sena yaan talatul. Taasaxa lamina yaan talatul i taa to fa'ulaa.” ³²A mu fefeng ri vungut sena fufuna ferawaiian sina taasaxa ri mataut sena fine pana.

Nase' A Matalava?

Mt 18:1-5; Lk 9:46-48

³³E nari, ri savat pe Kapanam e layaan ri laak lana saxa lifu nane fin nari, “A so ta mo mi taxa fegagelai pana la fena sangasan sitaara?” ³⁴Taasaxa ri pife sui a fiaian sina senaso ri fo fegagelai o nase' ta fefeng a pelalava la palou iri.

³⁵E nane nai e xel faxuvul a mu yaamut e xuus nari, “Nase' ta mataa rao i paamua, lavaxa i taa fasivi nane e i tafe savat sisiak sina maana xasano rabuna.”

³⁶E nane tao fatiginei a saxa lak la palou iri, a yote e xuus nari, ³⁷“Nase' ta mataa i taa xavang a lak malaan sena lak aanabe' lana isaak, lavaxa nane taxa xavangau. E nase' ta mataa a vubuxan xasingitau, nane pife vubuxan xasingitau sang mon taasaxa i taxa vubuxan xasingit vaxa a saxa aava fengau.”

A Mu Xaiyaas E Mu Fesing

Lk 9:49-50

³⁸E na Jon, na ti Jems, a xuuse, “Mataa ina Fepitaa, maam xalum a saxa mataa i taxa gei tapin a vovau saat lana isaam e maam pebukane senaso nane pife usi nano xuvul pamaam.”

³⁹E na Yesus a xuus nari, “Muta pebukane. Senaso tamo saxa mataa i taa vil a faisok malaan lana isaak, nane pife fexaxaas sena ferawai fasaat sega lumui. ⁴⁰Senaso nase! pife tisui netaara, i taxa tigma xuvul pataara. ⁴¹E nase! ta mataa i taa tavai a saxa la palou imi pana raarum marafut senaso mi usiau, na Krais, a mataa aave i taa siak tuunei a sepirigus xana.

⁴²“Tamo ta saxa mataa i taa paamuian a saxano mataa o lak malaan sena lak aanabe' talo i taa pife langai a ferawaian siak, lavaxa a roxo naak i taa pis fatofan a faat molava la kolumana e i taa tapin faduian pe la laman. (A fakasanaman sina Piran a faagut paaliu sena xaraxan aave.) ⁴³Tamo a maam a pasak fatateak lana fulung si Setan, lavaxa patal tapine. Senaso a roxo no taa waan pana ma saxa lana bina sina Piran sena waanan pana ma taragua lana fata aava taxa raam vulai e pi ta taxapusan ina. ⁴⁴Pe la bina aave, a xunus ina mataa i taa pife maat e a fata ina fakasanaman i taa raam vulai, vulai. ⁴⁵Tamo a kaam a pasak fatateak lana fulung si Setan, lavaxa patal tapine senaso a roxo pana ka saxa pe la bina sina Piran sena waanan pana ka taragua lana fata aava taxa raam vulai e pi ta taxapusan ina. ⁴⁶Pe la bina aave, a xunus ina mataa taa pife maat e a fata ina fakasanaman i taa raam vulai, vulai. ⁴⁷E tamo a xasa pamataam i taa vil fapoxoi nano, lavaxa put tapine. A roxo pana laaxan xe lana bina sina Piran pana mata saxa sena duian xe lana fata aava pi ta taxapusan ina pana mata taragua. ⁴⁸Pe la bina aave, a xunus ina mataa taa pife maat e a fata ina fakasanaman i taa raam vulai, vulai. *Ais 66:24*

⁴⁹A mu Juda ri fuuna timin a sol xuluna mu tatavai siri xena kai tapin a lalosaat ina. E malaan sena sol a mu lagafan taa savat la toyan sina mu rabuna xena kai tapin a lalosaat siri.

⁵⁰A sol a mo roxo taasaxa tamo a xakaarixan ina i taa taxapus malaafaa mi taa vil faxakaarik fulane? Lavaxa, mi taa toxan a sol la toyan simi e a luaian la palou imi.

A Fiaian Pana Tamaian

Mt 19:1-9; Lk 16:18

10 ¹E na Yesus a tamasiak pe Kapanam e fe paan xe pul Judia, e mui ri sivi xe paa la Raarum Jordan. E a malila ri maa savat fulaa sina pave e nane fapiti fulan nari.

²E saxano Ferasi ri maa savat sina senaso ri vubuk tafange pana saxa vuputkai sina mu Juda. E voxo ri fine, “A roxo tamo a saxa mataa i taa ta'ulan tapin a tefin sina?”

³E na Yesus a fin nari, “Lana vuputkai si Moses a kuus malaafaa?”

⁴E ri sui a fiaian sina malaan, “Na Moses a kuus turoxo pana mataa i taa xalei a lagasai ina fataxapin a tamaian sire. E a fexaxaas sena feng fa'uli na naasana xe la pabung sina.”

⁵E na Yesus a xuus nari, “Na Moses a xalei malaane senaso a xunus imi a tateak malaan sena mu bumi. ⁶Taasaxa la tangpat, a Piran a vesan a mataa e a tefin e re waan faxuvul. ⁷E voxo a mataa i taa ta'ulan a lifu si ninana e tamana ⁸e nane e a tefin sina re taa waan faxuvul malaan sena saxa. Re taa pife waan fepatok e a Piran i taa kat nare malaan se' re saxa mon. ⁹E voxo a so ta mo a Piran fo vil faxuvule, a pife fexaxaas sen' ta saxa mataa taa vil fepatoxan fulane.”

¹⁰Mui fulaa lana lifu, a mu fefeng ri fine pana ferawaian aanabe'. ¹¹E nane xuus nari, “Nase' i taa ta'ulan tapin na naasana e mui a tamai sina saxa tefin patak, i taxa kawaasan na naasana lana vilaana ina tamaian. ¹²E tamo ta saxa tefin i taa ta'ulan tapin na lavana e mui a tamai sina saxa tomexaan patak, nane sait vaxa, i taxa kawaasan na lavana lana vilaana ina tamaian.”

Na Yesus Xuvul Pana Mu Rafulak

Mt 19:13-15; Lk 18:15-17

¹³E a mu rabuna ri savat pana mu rafulak siri xe si Yesus senaso ri vubuk i taa tao faroxoi nari. Taasaxa mu fefeng si Yesus ri marala e ri tivotan nari. ¹⁴Layaan na Yesus a xalum a mu fefeng sina ri taxa vil malaane nane a maraleian nari e xuus nari malaan, “Siakmaan a mu rafulak xe siak. Muta tivotan nari! Ri taxa waan lana fatataganan sina Piran. ¹⁵Tuuna paaliu ne xuus nami, nase' ta mataa i taa pife lamon pana laak lana fatataganan sina Piran malaan sena mu rafulak aanabe', i taa pife laak lana.” ¹⁶E nane xel a mu rafulak xe sina e yot nari e tao faroxoi nari. E nane fenung xe sina Piran o i taa tavai a rafulak aanabe' pana roxoyan.

A Fiaian Pana Toyon Vulai

Mt 19:16-30; Lk 18:18-30

¹⁷Layaan na Yesus tangpat pana sangas fulaa a saxa mataa a falamaan xe sina e maa turung la nona e fine, “Mataa roxo ina Fepitaa, ne taa vil a so xena siaxaana toyan vulai xe vulai?”

¹⁸E na Yesus a sui a ferawaian sina malaan, “Senasou no xaliau pana mataa roxo? Piau ta saxa mataa fe roxo, a Piran sang mon a roxo! ¹⁹Nano, no texaas sena mu vuputkai si Moses:

Muneta punuk a mataa

Muneta xaakaam soxotan a tefin sina xasa mataa

Muneta fenau

Muneta kawaasan a isina saxa mataa

Muneta bitaana mataa

Suai se ninaam e tamaam”

Tln 20:12-16; Vpt 5:16-20

²⁰E nane xuus na Yesus, “Ne fo faxa'usi a maana vilaana aanabe' ti la yaan ne taxa lak modak.”

²¹E na Yesus a xalume e vubuxane e xuuse, “No taa vil a saxa mo lunai; falet e no fe faasot pana maana mo xapiak siim e no taa tavai a mu valagof pana fafanaian xapiak siim. E mui filimaan xe siak e no usiau. Tamo no taa vil malaane no taa toxan a maana mo xaves laa'ui la bina sina Piran.”

²²Layaan a mataa aanabe' a langai a ferawaian si Yesus a vilauna kanamsaat paaliu senaso nane toxan a maana mo xaves e maana xavala sait. E voxo nane falet pana mamaxusan molava paaliu.

²³E na Yesus a kaalum xolai e a xuus a mu fefeng sina, “A lagaf paaliu xana mataa aava toxan a fafanaian xaves xena laak lana fatataganan sina Piran.”

²⁴E a mu fefeng sina ri ipul pana ferawaian aanabe' taasaxa na Yesus a sui a fiaian siri e kuus fulaa, “Kamu rafulak, a laaxan xe lana fatataganan sina Piran a mo lagaf paaliu. ²⁵Naak a malui sena vio xena laak la valof ina matana maiyang sena mataa aava toxan a fafanaian xaves xena laak xe lana fatataganan sina Piran.”

²⁶E nari, ri ipul faagut paaliu e ri fine, “Nase' voxo fexaxaas sena laak lana fatataganan sina Piran?”

²⁷E na Yesus a xalum nari e kuus, “A mataa sang mon pife fexaxaas taasaxa xuvul pana Piran a maana mo xapiak a fexaxaas. Senaso a Piran sang mon a fexaxaas sena vilaana maana mo xapiak.”

²⁸E na Pita a kuus malaan, “Ai, nemaam, maam fo ta'ulan a maana mo xapiak simaam e maam taxa usi nano.”

²⁹E na Yesus a sui a ferawaian aanabe', “Ne kuus tuuna, nase' ta mataa i taa ta'ulan a lifu sina e i taa ta'ulan a vasaana o tina o ninana o tamana o mu rafulak sina e i taa ta'ulan a bina sina o xavala sina e i taa ta'ulan a maana mo xapiak soxotau e xana Lagasai Roxo; ³⁰a mataa aava vil malaane, i taa siak a maana mo xaves paaliu la yaan aanabe' e vaxa la maana yaan i taa filimaan sait. I taa siak a maana mo malaan sena mu lifu e fetinan e fevasaanan, e tauna e rafulak, e xavala xena uma. I taa siak a maasaxan sait xuvul pana xasano mo roxo senaso saxano rabuna ri taa vil pengan a mataa aave. Taasaxa lumui lana yaan fa'ui i taa siak a toyan vulai. ³¹Taasaxa nari aava ri taxa waan paamua naboxo, lumui ri taa waan lana fataxapiak ina xakatan.”

Na Yesus A Kuusan Fasavat A Vilaana I Taa Savat Sena

Mt 20:17-19; Lk 18:31-33

³²Layaan na Yesus e a mu fefeng sina, ri taxa laak xe kol Jerusalem nane ve taxa sangas paamuin nari. E a mu fefeng ri ipul pana vilaana aanabe' e nari lamina mu fefeng ri mimilisaat e ri mataut. E voxo nane xel patak a mu yaamut sina e xuus fatexaas nari fulaa pana so ta mo i taa savat sena. ³³Nane xuus nari malaan, “Mi langai. Layaan taara taa laak

saa xe Jerusalem a mu rabuna ri taa yot a Natuna Mataa e ri taa lisane xe sina mu paamua ina faxatangaana lotu. E nari, ri taa sei pana punuxaana e ri taa lisane xe sina paamua sina mu Rom. ³⁴A mu rabuna ina rawen ti Rom ri taa fesuaxane e ri taa xanuse. Ri taa sipe e ri taa punuxe. Taasaxa lamina yaan talatul i taa to fa'ulaa.”

A Fiaian Si Jems Nare Jon

Mt 20:20-28

³⁵E a ro lak si Sebedi, na Jems nare Jon re savat si Yesus e re xuuse, “Mataa ina Fepitaa, maame vubuk o no taa vil a mo aava maame taa fin nano pana.”

³⁶E nane xuus nare malaan, “Me vubuk ne taa vil a so xaame?”

³⁷E re fenung malaan, “Maame vubuk o maame taa nai la vena nai Piranan siim xuvul pama, saxa la pamuaan e saxa la paxaiya.”

³⁸Taasaxa na Yesus a xuus nare, “Name, me pife texaas sena so ta mo me taxa fi ai pana. Me fexaxaas sena siak a maasaxan ne taa siaxe? O me fexaxaas vaxa sena siak a maxarafan ne taa siaxe?” ³⁹E re kuus malaan, “Nemaame, maame fexaxaas.” E na Yesus a xuus nare, “A maasaxan aava ne taa siaxe, name sait, me taa siaxe. E a maxarafan aava ne taa siaxe, name sait, me taa siaxe. ⁴⁰Taasaxa pife faisok siak xena kuus turoxo pana nobina ina naian sime. Na Tamaang sang mon a fexaxaas xena faigotan a vepen xana mataa.”

⁴¹Layaan a xasano yaamut sangafilu ri langai sena mo aanabe', ri kasalan na Jems nare Jon. ⁴²E na Yesus a xel faxuvul nari xapiak e xuus nari, “Mi texaas sena vilaana sina saxano memai sina rabuna, ri pi lalamon sena rabuna siri. E mu matalava sait ri taxa siak fati mon a isiri saxa saxa. ⁴³Taasaxa semi, i taa piau! Nase' rao i taa siak a isin lava la palou imi i taa vil fasivie xe lapia. ⁴⁴E nase' rao i taa tigma paamua semi i taa sisiak simi xapiak ⁴⁵senaso a Natuna Mataa pife savat talo a rabuna taa sisiak sina, piau! Nane savat xena xavang a rabuna e xena tavai a malila pana toyan sina. A maatan sina i taa faroxoi a mu rabuna xapiak.”

Na Yesus Nare Baatimeas

Mt 20:29-34; Lk 18:35-43

⁴⁶E na Yesus xuvul pana mu fefeng xo ri fe savat pe Jeriko. E layaan ri ta'ulan na Jeriko xena laak xe kol Jerusalem a malila ri falet xuvul pari. E saxa mataa piif, a isina na Baatimeas a lak si Timeas, i taxa nai fenung pana faat la itina salan. ⁴⁷Layaan na Baatimeas a langai o na Yesus ti Nasaret taxa filimaan faasilak, nane xukulai faagut malaan, “Ai, Yesus, Lak si Devit, muluxau!”

⁴⁸E a rabuna xaves ri pebukane o i taa nai kasam. Taasaxa nane pe xukulai faagut fulaa saa malaan, “Ai, Lak si Devit, muluxau!”

49E na Yesus a tigena e kuus, “Xelmaane.”

E a rabuna ri xele e ri xuuse, “Faamamaas, tamasiak, senaso nane taxa xel nano.” 50E a mataa piif aave a tapin a marapi ina vupungan sina e tamasiak fataapus e falet xe si Yesus.

51E na Yesus a fine, “No vubuk ne taa vil a so xaanum?”

E a mataa piif a xuuse, “Ai, matalava ne vubuk kaalum fulaa.”

52E na Yesus a ferawai xe sina, “Falet, a namkaian siim fo vil faroxoi nano.” E a mataa aave a fexaxaas sena kaalum e nane usi na Yesus.

La Sande Fataxapiak Pe Jerusalem

Mt 21:1-9; Lk 19:29-38; Jn 12:12-15

11 1La fena sangasan siri xe Jerusalem, faasilak a ro bina Betani e Betfas, la xasing ina Put Pana mu Wai Olif, na Yesus a feng paamuin a ro fefeng taragua. 2E nane xuus nare malaan, “Falet xe la bina aapave e layaan me taa savat lana me taa xalum a fomirak ‘donki’ aava ri pi nanai xuluna lunai. Muluse e me lisanmaane. 3E tamo saxa mataa i taa fin name malaan, ‘Xenaso me taxa siak a ‘donki’ aamove?’ Me taa sui a fiaian malaan, ‘A Memai a vubuxane e mui i taa lisan fa'ulie xe nabe!’”

4E nare, re falet e re tingin a fomirak ‘donki’ aave a palei fatian pe la salan faasilak la matana lifu e re muluse. 5E saxano rabuna aava ri taxa tigena faasilak, ri fin nare, “Ai, me taxa mulus a ‘donki’ xenaso?” 6E re xuus nari malaan se Yesus fo xuus nare e a rabuna ri kuus turoxo e ri feng nare pana. 7E ro fefeng re lisan a ‘donki’ xe si Yesus e re timin a marapi sire xuluna ‘donki’ e na Yesus a nai xuluna. 8E a rabuna xaves ri sului a marapi siri pe la salan e xasano rabuna ri siak a raxana wai pana paxana aava ri fo siaxe pe lalatan e ri timine la salan. 9E a mu rabuna ri sangas paamua e lumui la mi Yesus e ri taxa xukulai faagut malaan,

“Hosaana! Faamamaas pana mataa i taa siak fati a isina Piran.

10Faamamaas sena fatataganan malaan se butaara Devit i taa savat xo. Hosaana, laa'ui la xunavata!”

11E nane laak xe pe Jerusalem e falet xe la tang lifu lotu sina mu Juda. E na Yesus xuvul pana mu rabuna, ri laak lana e ri sangas kaalum xolai. E mui na Yesus e mu fefeng sina ri ulaa xe Betani senaso faasilak a bina i suk.

Saxa Yaan Lamina Savatan Sina

Mt 21:12-22; Lk 19:45-47; Jn 2:13-16

12A yaan saxa lumui la paanen, ri ta'ulan a bina Betani rao ri taa ulaa fulaa xe Jerusalem e na Yesus xo, a lagai. 13E nane xalum a wai malaan sena xakaap a toxan a paxana xaves. E nane falet xe pave rao i taa murul a xalana. Taasaxa layaan nane fe savat pe la funa wai e xalume, piau ta xalana senaso pife yaan ina fuaian sina lunai. 14E nane faraweie malaan, “A rabuna taa pife fangan sema fulaa!” E mu fefeng ri langaie.

¹⁵E mui ri savat pe Jerusalem e ri laak lana tang lifu lotu pave. E na Yesus a xup tapin a mu rabuna aava ri taxa faasot pana mu bulmakau e sipsip lana lifu lotu. E nane puk tapin a mu ivin sina rabuna aava ri taxa fesoxulaj pana maana buk faat ina maraanan o ri taxa faasot pana mu maanu. ¹⁶E nane ti votan a rabuna rao ri muta yaas falak a maana mo xena faasot lana nobina ina lifu lotu. ¹⁷E nane fasei nari, a kuus malaan, “A Xakalayan sina Piran a kuus malaan, bo?

‘A lifu siak i taa waan a lifu ina fenungan siak xana mu rabuna xapiak.’

Ais 56:7

Taasaxa nami, mi fo vile malaan sena nobina ina fenauan.”

¹⁸A mu matalava sina rabuna aava ri faisok lana lifu lotu e mu rabuna aava ri masam pana mu vuputkai siri, ri langai a ferawaian sina e ri lalamon pana punuxaana taasaxa ri mataut se Yesus e sena rabuna vaxa, senaso a rabuna xo, ri ipul pana fepitaian sina.

¹⁹E la maana leaaf na Yesus e mu fefeng sina ri fuuna ta'ulan Jerusalem e ri ulaa xe pe la bina Betani.

A Fepitaian Sina La Fataraguiaana Yaan

²⁰La paanen lolof ri falet fulaa xe Jerusalem e ri xalum a wai aava na Yesus fo kuus fatutule. A wai naang fo maiyang ti la xarei ina xe laa'ui.

²¹E na Pita a lamon fa'uli a ferawaian si Yesus e xuuse, “Mataa ina Fepitaa, kaalum, a wai aava no fo fatutule, pevoxoxo, fo maiyang xo.”

²²E na Yesus a xuus nari, “Mi taa namkai faagut pana Piran. ²³Ne xuus tuunei nami, tamo ta mataa pana namkaian tateak faroxo i taa farawei a put aanabe' malaan, ‘Falet e lalaas du xe pe la laman’ e a put i taa vile. Nase' ta mataa rao i taa vil malaane, tamo i taa namkai faagut pana, a vubuxanan sina i taa savat. ²⁴E voxoxo ne xuus nami layaan mi taa fenung xe sina Piran mi taa namkai faagut sena mo aava mi fenung pana e i taa savat. ²⁵E fulaa, layaan mi taxa fenung xe sina Piran mi taa lamon tapin a mu vilaana saat aava xasano rabuna ri fo vile xe simi talo a Piran vaxa i taa lamon tapin a vilaana saat simi. ²⁶[Taasaxa tamo mi pife lamon tapin a vilaana saat sina xasano rabuna, lavaxa na Tamami pe laa'ui, i taa pife lamon tapin a vilaana saat simi.]”

A Vepen Si Yesus

Mt 21:23-27; Lk 20:1-8

²⁷E ri savat fulaa pe Jerusalem e ri laak pe lana tang lifu lotu. E mu paamua ina lotu e mu rabuna aava ri masam pana mu vuputkai e mu matalava sina mu Juda, nari xapiak, ri filimaan xe sina ²⁸e ri fine, “No taxa vil a faisok siim lapaana isin sise'? Nase' tavai nano pana gutan xena faisok malaan?”

²⁹E na Yesus a xuus nari, “Paamua ne taa fin nami pana fiaian saxa e layaan mi suie ne taa xuus nami o ne taxa faisok lapaana gutan sise'. ³⁰A

fiaian siak a malaan: A faisok ina fasufan aava na Jon fo vile, a mo sina Piran ti laa'ui o mo sina mataa mon? Mi xuusau!”

³¹E nari, ri ferawai faxuvul e ri kuus malaan, “Tamo taara taa kuus ‘ti laa'ui’ nane i tamaa kuus: ‘Lavaxa, senasou mi pife namkai sena?’
³²Taasaxa, taara mataut xena xuuse, o sina mataa mon.” Ri taxa mataut senaso a rabuna, ri taxa lamon se Jon o nane a mataa ina kuus fatuxai tuuna.

³³Pevox, ri sui a fiaian si Yesus malaan, “Nemaam, maam vungut.” E na Yesus a xuus nari, “Lavaxa, ne taa pife xuus fatexaas nami sait pana gutan nenia, ne taxa faisok lapaana.”

Ferawaian Paap Pana Uma Wain

Mt 21:33-46; Lk 20:9-19

12 ¹E na Yesus a tangpat pana ferawai xe sina mu matalava pana ferawaian paap malaan: “Saxa mataa a xapis a uma wain e fakaliuane pana vaafa faat. E nane xaf a vaa'ul lapaana nobina ina paamimitaana xalana wain. E nane vesan a lifu modus faasilak la tana uma. Taasaxa nane pife waan pave. Nane xuus fatexaas a xasano rabuna rao ri taa faxatang a uma aave e ri taa lisan a saxano wain ri vesane xe sina lumui xena maraan a uma sina. E nane xo falet xe pe lasuun.
²Layaan a mu xalana wain ri fo matoxol a mataa aave, a feng a saxa sisiak sina xe la uma talo a mu rabuna aapave ri taa tavaie pana wain.
³Taasaxa mu rabuna ina faxatangaana uma ri fesipane e ri feng fa'ulie.
⁴E fulaa a mataa aave, a feng a xasa sisiak xe siri. E nari, ri sip pengane la putuna e ri famangile pana xasano vilaana saat. ⁵E a mataa aave, a feng a saxa sisiak fulaa e ri sip punuxe. Lumui nane feng a saxano sisiak fulaa taasaxa rabuna pave la uma, ri sip a saxanofuna e ri ngaapunuk xasanofuna.

⁶La fataxapiak, senaso piau ta sisiak fulaa, nane feng a lak tomexaan sina aava nane vubuxan xasingite. A mataa aave a lamon malaan, ‘Tuuna naak ri taa suai sena lak siak.’

⁷Taasaxa mu rabuna ina faxatangaana uma, ri fexuus la palou iri, ‘Ai, a lak sina naboxo, tamo taara taa punuxe, a uma aanabe' i taa xataara, bo?’
⁸E ri yot a lak sina mataa e ri punuxe e ri tapine xe pe lamina uma.

⁹A mataa aave i taa vil a so? I taa savat pe la uma e i taa sip punuk a mu rabuna aapave e mui i taa xel a xasano rabuna xena faxatangaana uma sina.” ¹⁰Na Yesus a fin nari, “Mi pife xalum a xakalayan aava kuus malaan, bo?

‘A faat aava mu rabuna ri bai vesan a lifu pana,
a faat naang, a savat xaaxaak mata ina lifu, a faat pana faisok
molava paaliu.

¹¹A faisok aanabe' a savat sina Piran.

E a faisok sina, taara taa ipulane.”

Yng 118:22-23

¹²A mu matalava ri langai si Yesus e ri texaas o nane taxa ferawai paap seri e ri vubuk yote taasaxa ri mataut sena malila aava ri taxa ti langaie. E voxo a mu matalava aave ri tamasiak e ri falet.

A Fiaian Pana Taakis

Mt 22:15-22; Lk 20:20-26

¹³Lumui a mu matalava sina mu Juda, ri feng a saxanu Ferasi e saxanu tuvaat si Herot xe si Yesus senaso ri vubuk o i taa faasaal pana ferawaian sina. ¹⁴Ri savat sina e ri fia'i malaan, “Mataa ina Fepitaa, maam texaas o no kuus tuuna vulai e no pife mataut sena mataa e voxo no fepitaa tuuna pana ferawaian sina Piran sang mon. Lavaxa, no lamon malaafaa? A roxo maam taa tavai a Paamua sina mu Rom pana taakis o piau? ¹⁵Maam taa maraan a taakis sina o piau?”

Taasaxa na Yesus a texaas o ri taxa bite e xuus nari, “Senasou mi taxa tafangau? Tamo toxan a faat move, siakmaane.” ¹⁶E ri siak a saxa e ri tavai na Yesus pana. E nane fin nari malaan, “A xaxaalua sise! e a xakalayan sise! nabe! taxa waan xuluna faat aanabe!?”

E ri sui a ferawaian sina o a xaxaalua e xakalayan si Sisaa, a paamua ti Rom.

¹⁷E na Yesus a xuus nari, “Lavaxa, tavai a Paamua ti Rom pana maana mo sina e tavai a Piran laa'ui pana maana mo sina.” E nari, ri ipul faagut.

A Fiaian Pana Toyan Ti Laa'ui

Mt 22:23-33; Lk 20:27-38

¹⁸E saxanu Sedusi (nari aava ri kuus o piau ta toyan lamina maatan) ri savat si Yesus e ri fine malaan, ¹⁹“Mataa ina Fepitaa, na Moses a xalei a saxa vuputkai sitaara, a kala malaan, “Tamo ta mataa i taa maat e na naasana taxa waan pana piau ta lak, lavaxa na tina mataa aava fo maat i taa tamai sina tefin aave xena fasavataana mu rafulak xa tina.’ ²⁰Voxo, a matafetinan ve ri pisiguak, ri taxa waan e saxa, a lak tuaan, a tamai e maat taasaxa nare, re piau ta lak. ²¹E mui a saxa tina ti lamina a tamai sina tefin aave e nane sait a maat e piau ta lak. E saxa fulaa a malaan sait. ²²E nari pisiguak xapiak ri tamai sina tefin aanabe! e ri maat pana piau ta lak. E mui a tefin sait a maat. ²³Lavaxa, layaan a Piran i taa fatatoi a mu rabuna fulaa, a tefin aave i taa waan na naasase! senaso nane fo tamai siri xapiak?”

²⁴E na Yesus a xuus nari, “Naak mi vungut, senaso mi pife texaas sena ferawaian sina Piran e mi vungut sena gutan sina. ²⁵Layaan a Piran i taa fatatoi a mu rabuna fulaa ri taa pife tamai e ri taa pife vubuk siak a tefin o tomexaan. Ri taa waan malaan sena mu angelo ti laa'ui. ²⁶Taasaxa lamon fulaa pana toyan ti la maatan siri. Nami, mi pife texaas sena

xakalayan si Moses pana xuuskuus ina latan taxa raam e a Piran a xuus fatexaase malaan, “Nenia, ne Piran si Abraham e si Aisaak e si Yaakop.”
 27E voxo a Piran pife Piran sina mamaat, piau! Nane ve a Piran sina mu rabuna to. Naak mi fo milung faagut.”

A Fiaian Pana So Ta Vuputkai A Molava

Mt 22:34-40

28E saxa mataa aava masam sena mu vuputkai si Moses a savat e nane langai a ferawaian siri e nane texaas o na Yesus fo sui faroxoi a maana ferawaian siri. E nane fin na Yesus malaan, “A so ta vuputkai a fufuna maana vuputkai xapiak?”

29E na Yesus a xuuse, “Langaiau nami Israel. A vuputkai paamua a malaan, ‘A Piran, a Matalava sitaara, a Piran saxa mon. 30E nami, mi taa usie e suai sena vilaana sina pana vilau xapiak simi, pana xunus imi xapiak, lana lalamonan xapiak simi e pana maana gutan xapiak simi.

Vpt 6:4-5

31E fulaa, a fataraguiiana vuputkai a malaan, “Mi taa vubuxan a xasano rabuna malaan se' mi vubuxan nami xa. Piau ta vuputkai molava sere.”

Vlp 19:18

32E a mataa aave a xuuse, “Ai, tuuna paaliu Mataa ina Fepitaa. No kuus tuuna o a Piran a saxa paamua e piau ta saxa malaan sena. 33E taara taa suai sena pana xunus itaara xapiak e pana masaman xapiak e pana maana gutan sitaara. E taara taa vubuxan a xasano rabuna sait. A vilaana aanabe' a molava sena mu tatavaian xana Piran e mu falfaalan sait.”

34Na Yesus a texaas o nane ferawai faroxo e a xuuse, “No taxa xaveak masam a vilaana ina fatataganan sina Piran.” E mui xo, a mu matalava ri mataut sena tafang fulane.

Na Krai A Lak Sise'?

Mt 22:41-46; Mt 23:1-7; Lk 20:41-47

35Lumui, la tang lifu lotu, na Yesus a fapiti a malila e a fia malaan, “Senasou a mu rabuna aava ri masam pana xakalayan ti kawai ri kuus o a Mataa Failai ve a lak si Devit? 36Na Devit sang a ferawai lapaana Vovau Xaradak:

‘A Piran a kuus xe sina Memai siak: no nai su' la pamuaan siak fefexaas a yaan ne timin a mu xaiyaas siim lapaana kaam.’

Yng 110:1

37E na Devit xo a xali a Mataa Failai pana Memai sina e malaafaa a Mataa Failai a fexaas sena waan a natu Devit?” E a rabuna ri faamamaas pana ferawaian sina.

38E fulaa nane fapiti nari malaan, “Faxatang! Xalum a vilaana sina mu rabuna aava ri fepitaa pana mu vuputkai taasaxa muta pok nari. Ri

vubuk sangas lana marapi modus siri e ri vubuk siak a suaian lava pe la nobina ina faxuvulan. ³⁹E ri vubuk nai paamua la nobina sina matalava lana lifu ina faxuvulan e pe lana fenamo. ⁴⁰E nari, ri siak palou a mu lifu sina lutefin aava tomexaan siri fo maat. E ri fenung xe sina Piran pana fenungan modus paaliu talo rabuna taa suai seri. A buk rabuna aanabe' a Piran i taa tavai nari pana fakasanaman molava paaliu.”

A Tatavai Sina Tefin Nakmaal

Lk 21:1-4

⁴¹E mui nane nai kaalum faasilak la bina ina tatavai pana faat lana lifu lotu. E nane xalum a mu rabuna ri timin a maana faat lana mo ina tifaana. E a mu matalava ri timin a faat xaves. ⁴²E a saxa tefin nakmaal, a tomexaan sina fo maat xo, a savat e tatavai pana toea taragua mon.

⁴³E na Yesus a xel a mu fefeng sina e xuus nari malaan, “Ne kuus tuuna paaliu xe simi, a tefin aapave a tavai a Piran pana faat molava sena maana xasano rabuna. ⁴⁴Senaso nari, ri toxai faat xaves taxa waan lunai taasaxa nane fo timin a faat xapiak sina e piau ta faat fulaa taxa waan la tana.

A Mu Yaan Ri Taa Savat Lumui

Mt 24:1-51; Lk 21:5-36

13 ¹Layaan na Yesus a ta'ulan a tang lifu lotu saxa fefeng sina a xuuse, “Mataa ina Fepitaa, xalum a maana faat ri molava paaliu. A maana mu lifu aanabe' ri roxo sang.”

²E nane sui a ferawaian sina malaan, “No xalum a maana mu lifu lava, bo? Ne xuus nano o lumui, piau ta faat saxa i taa waan xuluna xasa faat. Xasano rabuna ri taa ngas tapin a mu faat xapiak aanabe'.”

³E lumui lamina, layaan nane taxa nai kaalum fasivi xe la matana tang lifu lotu ti pe xuluna Put Olif, a matafetuaan, na Pita narie Endru e na Jems narie Jon, ri savat sina e ri fine malaan, ⁴“Xuus fatexaas nemaam o laso ta yaan a maana mo aanabe' i taa savat e pana fakalimaan in a savatan sina mo aave.”

⁵E na Yesus a fapiti nari e kuus malaan, “Faxatang semi, ulaa rabuna tamaa bit nami. ⁶Lumui a rabuna xaves ri taa savat e ri taa kuus o ri savat lapaana isaak. Ri taa xali nari xa pana isaak, a Mataa Failai, e voxo a rabuna xaves ri taa usi nari. ⁷E vaxa layaan mi langai sena mu rawen e maana ferawaian ina rawen, muta mataut. A vilaana malaan ri taa savat taasaxa taxapusan ina maana mo xapiak i taa pife savat lunai. ⁸A mu bina ri taa fevis e a mu fatataganan ri taa rawen. E a mara'ulia xaves taa savat la maana mu bina e a yaan ina song taa savat sait. Taasaxa maana mo aave, ri taa savat malaan sena maasaxan sina tefin paamuina luluxan.

⁹E nami, mi taa faxatang, senaso xasanu tuvaat ri taa yot lisan nami xe sina rabuna ina tiisan e ri taa sip nami lana lifu ina faxuvulan. E mi

taa tigena la nona mu matalava e mu piran sina rabuna sena isaak. E mi taa xuus fatexaas nari paga. ¹⁰Taasaxa paamuina mo aave taa savat, a Lagasai Roxo i taa fepitaianan pe la maana mu bina xapiak. ¹¹Layaan ri taa yot lisan nami xe sina mu matalava, muta lalamon mimilisaat pana so ta ferawaian mi taa xuus nari pana senaso a Vovau Xaradak i taa fatexaas nami pana so ta ferawaian mi taa kuusane.

¹²E la yaan aapave a mu fetinan ri taa yot lisan a tiri e mu fetama ri taa yot lisan a lak siri e mu rafulak ri taa yot lisan a ninari e tamari e ri taa lisan nari xe lana maatan. ¹³E nami, a maana rabuna taa baijan nami senaso mi paa xolai pana isaak. Taasaxa tamo ta mataa siak i taa tigena fatateak fefexaxaas la yaan fataxapiak, ne taa fakaxupe.”

¹⁴“Layaan mi taa xalum a saxa vilaana mosaat paaliu malaan: a mataa i taxa tigena pe lana Nobina Taap Xasingit (laman pana e no taa masame), la mu yaan aave a mu rabuna pe Judia ri taa sinuf e ri taa paan fataapus xena fufunai laa'ui xuluna put. ¹⁵E tamo ta mataa i taxa tigena xuluna lifu i muta sivi xe lana xena siak a mo sina, piau! Falet fataapus! ¹⁶E tamo ta mataa i taxa faisok pe lana uma, i muta ulaa xena siak a marapi sina, piau! ¹⁷Muluk a lutefin aava ri tiva e muluk a lutefin aava ri taxa fasus a lak siri lana mu yaan aave. ¹⁸Fenung xe sina Piran pana mu yaan aave ri taa pife savat la mu yaan vutung. ¹⁹A mu yaan aava ri taa savat ve a yaan ina fakasanaman. A yaan saat malaan pife savat paamua ti la yaan ina tangpat e fefexaxaas tanin. E a buk yaan aanabe' i taa pife savat fulaa. ²⁰Tamo Piran i taa pife faxalif a mu yaan ina fakasanaman aave a mu rabuna xapiak ri taa maat taasaxa Piran a faxalife senaso nane lalamon pana mu rabuna tatagan sina.” ²¹Pevoxoxo, tamo ta mataa i taa xuus nami pana, ‘Xalume, na Krai naboxo!’ o kuus malaan, ‘Nane taxa waan pave!’ muta langaie. ²²Senaso a mu kraisi bit ri taa savat xuvul pana mu mataa ina xuus fatuxai bit siri e ri taa vil a maana mo fa'ipul e ri taa vil a maana buk fakalimaan aava xena tafang pana familungaana mu rabuna tatagan sina Piran. ²³Taasaxa lalamon faagut paaliu pana mo aanabe' aava nenia, ne fo xuus fatexaas nami pana.

²⁴Lana mu yaan aapave, lana yaan ina fakasanaman:

‘A ngaas i taa pife lang faagut e fulun i tafe suk ²⁵e mu vapara ri taa poxo ti laa'ui e maana mo faagut pe laa'ui ri taa radakui.’

Ais 13:10, 34:4

²⁶E mui a rabuna ri taa xalum a Natuna Mataa, i taxa filimaan lana vata pana gutan e malang sina. ²⁷E i taa feng a mu angelo e ri taa xel faxuvul a mu rabuna tatagan sina ti puua, ti paa, ti pul, ti kol, ti la mu bina lasuun xuluna xavala e ti la mu bina lasuun pe laa'ui.

²⁸Naboxo laman pana ferawaian paap sena nuua: layaan a raxana i taxa fungus, mi texaas o a mu yaan roxo ri taa savat. ²⁹E malaan sait, layaan mi taa xalum a maana mo aava ne fo xuus nami pana, lavaxa mi

taa texaas o a Natuna Mataa i taxa waan faasilak, i taxa tigina lamalei la matana lifu simi. ³⁰Tuuna, ne xuus tuunei nami o a saxano rabuna aanabe' ri taa pife maat lunai e maana mo aava ne fo xuus nami pana, ri taa savat. ³¹Pe laa'ui la finavata e nabe' la xavala a maana mo xapiak ri taa taxapus, taasaxa ferawaian siak i taa pife taxapus.

³²Piau ta mataa i taa texaas sena yaan o mariaas a maana mo aave ri taa savat. A mu angelo e a Natuna Mataa sait ri pife texaas. Na Tamaang sang mon a texaas. ³³Pevoxoxo, lalamon faagut, mi taa faxatang vulai senaso mi pife texaas sena yaan ina savatan sina. ³⁴E voxoxo nami, mi malaan sena ferawaian paap aanabe': saxa mataa a tamasiak xena ulut e a xuus fatexaas a mu sisiak sina pana mu faisok xari saxa saxa. E nane a fasei a mataa saxa o i taa faxatang faagut vulai pana matana lifu. ³⁵E voxoxo, faxatang vulai senaso mi pife texaas sena yaan a matalava i taa ulaamaan xe simi. Mi pife texaas o leaaf paaliu o la xunavung o la paanen lolof o la paanaas. ³⁶Ulaa i tamaa savat fa'ipul maan e nami, mi taxa matef. ³⁷Ne fasei faagutan nami xapiak, faxatang vulai!"

A Vilaana Sina Saxa Tefin
Mt 26:1-16; Lk 22:1-6; Jn 12:1-8

14 ¹La yaan taragua paamuina yaan molava sina mu Juda, a Yaan ina Paaliuan e a fenamo ina Bret A Piau Ta Yiis, mu matalava ina lotu e rabuna ina fepitaa pana mu vuputkai, ri taxa lo lalamon pana so ta vilaana ri taa vil kasame xena yotaan na Yesus e punuxaana. ²E ri kuus malaan, "La fena fenamo piau! Senaso a malila ri tamaa marala e ri taa fevis."

³La yaan naang ve, na Yesus taxa waan pe Betani lana lifu si Saimon aava tana tamu tapak. E layaan nari xapiak, ri taxa mati fafangan, saxa tefin a savat pana fomirak 'botol' pana mo lalas aava musung ina roxo paaliu e a mamareiai ina molava temasaat. Ri xali a mo lalas aanabe' pana Naart. E a tefin aave a gurum a 'botol' e tiuan a naart la putu Yesus.

⁴E saxano rabuna aava ri xalume, ri marala faagut e ri riis a tefin e ri kuus, "Xenaso no kawaasan a naart pana tiuanaana xulu Yesus? ⁵Tamo no taa faasot pana, a faat ina a fexaxaas xena maraan a mataa ina faisok lana mariaas saxa. Naak i taa roxo tamo taara taa faasot pana xena tavaiaana mu rabuna valagof pana faat ina." E voxoxo ri taxa lo riis malaan a tefin aave pana.

⁶Taasaxa na Yesus a sei nari, "Naapalaan! Muta riise! Xenaso mi maraleiane? Nane fo vil a mo roxo xaanak. ⁷A mu valagof ri waan xuvul pami vulai e mi fexaxaas xena xavangaan nari pana vilaana roxo vulai. Taasaxa nenia, ne taa pife waan xuvul pami vulai. ⁸A tefin aanabe' fo vil a mo roxo paaliu, nane fo fasufau pana mo lalas paamuina xaxaafaian siak. ⁹A tuuna paaliu ne xuus nami, a so ta bina aava Lagasai Roxo siak i

taa savat lana, a mu rabuna ri taa langai a vilaana roxo a tefin aanabe' fo vile. A vilaana sina i taa pife malufan.”

¹⁰E na Judas Iskeriot aava saxa yaamut, a falet xe sina mu memai priis senaso rao i taa pet lisan na Yesus xe siri. ¹¹E layaan ri langaie ri faamamaas paaliu e ri kuus o ri taa tavai na Judas pana faat 'silva'. E nane a lalamon o laso ta yaan e pana so ta vilaana a fexaxaas nane i taa pet lisan na Yesus xe siri pana.

A Fanganan Fataxapiak

Mt 26:17-30; Lk 22:7-23

¹²A paanen ina yaan mata ina fenamo molava sina mu Juda, a yaan ina Bret A Piau Ta Yiis, e a yaan ri fuuna punuk a mu sipsip xena fenamo ina Paaliuan a savat.^f La yaan aave a mu rabuna si Yesus ri fine, “Maam taa faigotan a nobina xena fanganan sitaara faa? No lalamon malaafaa?”

¹³E nane feng a fefeng taragua talo re taa faigotan a vepen xena fanganan e xuus nare, “Falet xe Jerusalem e layaan me taa xalum a mataa i taxa yaas a raarum, usie. ¹⁴E layaan i taa laak lana lifu me taa fin a mata tafuna lifu malaanabe!, 'A Mataa ina Fepitaa a faii malaan: A lifu xaanak faa? A palifu rao ne taa fangan xuvul pana mu fefeng siak xena fakalimaanaana yaan ina Paaliuan.’ ¹⁵E a mata aave i taa faxalit name pana palifu molava roxo aava nane fo faigotane. Name, me taa faigotan a fanganan sitaara pave.”

¹⁶E a rovaat sina re falet e re fe laak lana Jerusalem e a maana mo ri savat malaan sena ferawaian si Yesus. E voxo re faigot xena fenamo ina Paaliuan.

¹⁷E la nona leaaf na Yesus e maana xasano fefeng sina ri savat sirie. ¹⁸E layaan nari xapiak ri taxa mati fafangan na Yesus a xuus nari, “Ne kuus tuuna, a saxa mataa nabe! la palou itaara i taa pet lisanau xe la mana mu matalava sina mu Juda. A saxa ti la palou imi aava i taxa fangan xuvul paga.”

¹⁹E nari xapiak ri mimilisaat sena ferawaian sina e ri taxa lo xuuse, “A tuuna, pife nenia!”

²⁰E nane xuus nari, “A toxan a saxa mataa aava i taxa sugup a bret lana 'dis' xuvul paga, i taa vile. ²¹Senaso a Natuna Mataa i taa punuxan malaan sena Xakalayan ti Kavai fo xuus netaara pana. Taasaxa muluk a mataa aava i taa pet lisan a Natuna Mataa xe sina mu rabuna saat. A roxo naak a buk mataa malaan i taa pife luxan.

A Fufuna Vilaana Ina Matafanganai Sina Memai

1 Kr 11:23-25

²²E layaan ri taxa fangan, na Yesus a siak a xavil ina bret e fenung pana e viaxe e tavai nari pana e a kuus, “Siaxe e mi ngane, nabe! ve a meska siak.”

^f 14:12 A fenamo aanabe' a fakalimaan a yaan a Piran a punuk a mu lak tuaan sina mu Isip e a liu a mu lak tuaan sina mu Juda.

²³E nane siak a lisa pana wain e fenung pana sait e tavai nari pana. E nari xapiak ri nume.

²⁴E nane xuus nari, “Nabe' ve a ria iga. I taxa kuus turoxo sena ferawaiian sina Piran. A ria iga i taa talatiu xana mu rabuna xaves. ²⁵Ne kuus tuuna o ne taa pife num a wain fulaa fefexaxaas ne taa num a wain fa'ui xuvul pami lana fatataganan sina Piran.”

²⁶Lumui ri yangan a yanganan, ri tavaalak e ri falet e fe laak xuluna Put Olif.

Na Yesus A Kuus Fatuxai Pana Vilaana Si Pita

Mt 26:31-35

²⁷Layaan ri taxa sangas lunai na Yesus a xuus nari, “Nami xapiak, mi taa sinuf e mi taa ta'ulanau senaso fo xaleian malaan:

‘Ne taa sip punuk a mataa ina faxatangaana mu sipsip e a mu sipsip ri taa falet fepatok.’ *Skr 13:7*

²⁸Taasaxa layaan ne taa savat fulaa ti la maatan ne taa falet paamuin nami xe Galili.”

²⁹Taasaxa na Saimon Pita a xuuse malaan, “Tamo a maana xasano rabuna siim ri taa sinuf tapin nano, nenia, ne taa pife sinuf.”

³⁰E na Yesus a suie malaan, “Ne kuus tuuna, tanin, lana vung aanabe' nano sang mon no taa kuus o no pife texaas sega. E no taa kuus malaan faatalatul paamuina pura i taa rawei faataragua.”

³¹Taasaxa na Pita i taxa lo kuus, “Naapalaan ri taa punuxau xuvul pama, ne taa pife faaxolusan nano.” E nari xapiak sait ri taxa kuus malaan sena.

Lana Uma Getsemani

Mt 26:36-46; Lk 22:40-46

³²E ri savat la saxa bina, isina Getsemani, e nane xuus a mu fefeng sina, “Nai bang nabe' talo ne taa fenung xe sina Piran.” ³³E nane xel na Pita, Jems e namaa Jon e rutul sangas falet famodak fulaa e nane femimilisaat e femamaxus lana xunus ina ³⁴e a xuus narutul, “A vilau iga a mamaxus temasaat paaliu faasilak rao ne taa maat. Mutul nai nabe' e mutul faxatang.”

³⁵E nane sangas famodak fulaa et e fe poxo lapia e fenung faagut xe sina Piran rao i taa siak tapin a matafanan molava aava i taa savat sina. ³⁶E nane taxa lo kuus, “Aaba,[§] Tamaang! Nano, no fexaxaas sena vil a maana mo xapiak. Tamo a fexaxaas, muta tavaiau pana maasaxan aanabe'. Taasaxa muta usi a vubuxanan siak. No texaas tuuna sena so ta mo a roxo.”

^{§ 14:36} A vapaling aanabe' ti pok Hibrui, a malasuf ina malaan: Tamaang.

³⁷E nane ulaamaan xe la nobina sirutul e rutul taxa matef e nane ferawai xe si Pita malaan, “Saimon, no taxa matef? A sou no pife feaxaas sena faxatang pana awa saxa? ³⁸Faxatang e fenung vulai talo a tatafangan i taa pife savat xe siim. A xunus ina mataa a tateak taasaxa a vipin ina, piaul!”

³⁹E fulaa na Yesus a falet famodak xena fenung xe si Tamana malaan paamua. ⁴⁰E lamina nane savat fulaa sirutul e rutul taxa lo matef senaso a matarutul a matafan temasaat. E nane ferawai xuvul parutul taasaxa rutul pife texaas o rutul taa sui a ferawaian sina malaafaa.

⁴¹La fatalatulaana savatan sina, na Yesus a fin narutul, “Mutul taxa lo matef lunai? Lavaxa, taxapus! A yaan fo savat xo. Naboxo ri taa pet lisan a Natuna Mataa xe la mana mu rabuna saat. ⁴²Para! Taara taa falet. Kaalum, a mataa ina pet lisanau naboxo fo savat!”

A Yotaan Na Yesus

Mt 26:47-56; Lk 22:47-50; Jn 18:3-11

⁴³A mu matalava e mu paamua ina lotu e mu rabuna aava ri fepitaa pana vuputkai, ri feng a malila pana pinis e pana vam xe si Yesus. Layaan na Yesus i taxa ferawai lunai a malila aanabe! ri savat xuvul pa Judas Iskeriot, saxa yaamut si Yesus, xena yotaana.

⁴⁴Na Judas fo xuus fatexaas nari pana saxa fakalimaan nane taa vile, “Nase! ta mataa ne taa fe nguse, nane ve na Yesus. Mi yote e mi tao fatateaxe e mi xelee saa xuvul pami.” ⁴⁵La filimaan si Judas, nane sangas soxot et na Yesus e a kuus, “Mataa ina Fepitaa” e fe nguse. ⁴⁶E a mu rabuna ri yot marasaxain na Yesus e ri tao fatateaxe. ⁴⁷Taasaxa saxa fefeng si Yesus aava i taxa tigina faasilak, a siak a pinis sina e rao i punuk a saxa sisiak sina memai ina lotu. Taasaxa faasaal e a patal tapin a tangana mon.

⁴⁸E na Yesus a fin nari, “Senasou mi savat la vung pana vam e pana pinis xena yotau? Mi lamon o nenia, ne mataa ina fenau? ⁴⁹La maana yaan xapiak ne waan xuvul pami lana lifu lotu. E ne taxa fepitaa taasaxa mi pife yotau pave. Mi fo vil malaane senaso a Xakalayan ti Kavai fo kuus pana.” ⁵⁰E a mu fefeng sina ri ta'ulane e ri sinuf.

⁵¹E saxa mataa xulau aava usi na Yesus, nane toxan a marapi pasak sang mon la tana. E a rabuna rao ri yote e ri tao fatateak a marapi sina ⁵²taasaxa nane ta'ulan a marapi sina e sinuf pana tana gof.

Na Yesus A Tigina La Nona Mu Matalava

Mt 26:57-68; Lk 22:67-71; Jn 18:12-13,19-24

⁵³E a malila ri lisan na Yesus xe la lifu sina memai ina lotu. E mu paamua ina lotu, mu matalava sina mu Juda e mu rabuna ina fepitaa pana mu vuputkai, nari xapiak ri savat faxuvul pave. ⁵⁴E na Saimon Pita

xo, taxa lo usi na Yesus lasuun famodak e fe laak lana tavatau xuvul pana mu rawen sina memai ina lotu e fe nai maari la vangana fata.

⁵⁵E mu matalava e mu paamua aave, ri langai a mu kuusan sina rabuna rao ri taa punuk na Yesus taasaxa piau ta ferawaian siri fefexaxaas. ⁵⁶A rabuna xaves ri bit tifi na Yesus taasaxa mu ferawaian siri pife saxa.

⁵⁷A saxa a tigma e a bit tifi na Yesus pana ferawaian sina malaan: ⁵⁸“Ne langai na Yesus a kuus malaan, ‘Ne taa ngas tapin a lifu lotu aava mi vesane pana mami e lana yaan talatul ne taa vesan fa'ulie taasaxa ne taa pife vesane pana maak.” ⁵⁹Taasaxa xasano rabuna ri kuus patak e piau ta ferawaian siri fexaxaas xena kuus turoxo.

⁶⁰Taasaxa na Yesus a pife malaan seri, a tigma kasam mon.

E a memai priis a tamasiak e sangas falet xe sina e fine, “No pife langai a maana ferawaian sema? A sou no pife sui a ferawaian siri?” ⁶¹E na Yesus a tigma kasam fatateak.

E a memai a fine fulaa, “Nano, no Natuna Piran, a Mataa Failai?”

⁶²E na Yesus a xuuse, “Tuuna, nenia! E mi taa xalum a Natuna Mataa i taa nai la pamuaan pana gutan e i taa filimaan xuluna vata ti laa'ui.”

⁶³E layaan a memai ina lotu a langai a ferawaian aanabe' nane kasal e ririk a mu marapi sina xena faxaalit o nane lamon a ferawaian si Yesus a saat paaliu senaso a siak tifi nane pana isina Piran. E nane xukulai faagut e kuus, “Naapalaan, taara taa kuus panaso fulaa! ⁶⁴Netaara xapiak fo langai a ferawaian saat sina, mi lamon a so pana?”

E nari xapiak ri ferawai malaan, ri kuus, “Fo faasaal xo! I taa punuxan!” ⁶⁵E saxanofuna ri kaanus xuluna e ri pis votan a matana e ri tuxe e ri fine, “Tamo no Natuna Piran Tuuna no xali nase! fo sip nano?” E a mu rabuna ina kaalum votai ri yote e ri sip fulane.

A Faaxolusan Si Pita

Mt 26:69-75; Lk 22:56-62; Jn 18:16-18,25-27

⁶⁶E na Pita taxa nai maari lana tavatau e saxa sisiak tefin sina memai priis a filimaan ⁶⁷e nane xalum na Pita aava taxa nai maari la vangana fata e taxa lo falime e a xuuse, “Nano sait no fuuna waan xuvul pa Yesus ti Nasaret.”

⁶⁸Taasaxa na Pita a faaxolus malaan, “Ne pife texaas sena so ta mo no taxa ferawai pana.” E nane falet xe la matana yalaxau.

⁶⁹E mui a tefin aave a xalume fulaa e a kuusane xe sina mu rabuna ri taxa tigma pave, “Nane sait a saxa siri.” ⁷⁰E na Pita a faaxolus fulaa.

Lumui famodak a mu rabuna faasilak ri fin fulane, “Kuus tuuna, naak no saxa fefeng si Yesus senaso no ferawai pana pok bina ti Galili?”

⁷¹E nane ferawai vavotai faagut, a kuus fatateak malaan, “Nenia, ne pife texaas sena mataa mi taxa ferawai pana.”

⁷²E fataapus lamina faaxolusan sina saxa pura a fataragui a raweian sina. E na Pita a lamon fa'ulaa o na Yesus a xuuse malaan, “Paamuina

pura i taa rawei faataragua no taa kuus faaxolusanau faatalatul.” E na Pita a mimilisaat faagut e a savat xe lamalei e fetaangiis.

Na Yesus A Tigina La Mata Pailat

Mt 27:11-26; Lk 23:2-3,18-25; Jn 18:29–19:16

15 ¹La paanen lolof a mu paamua ina lotu, mu matalava sina mu Juda e mu rabuna ina fepitaa pana vuputkai, nari xapiak ina faxuvulan lava sina mu Juda, ri ferawai faxuvul o ri taa vil a so pa Yesus. E ri lalamon rao ri taa pise e ri taa lisane xe si Pailat. E voxo ri vil malaane.

²E na Pailat a fine malaan, “Nano, no piran king sina mu Juda?”

E na Yesus a suie, “Nano, no fo kuus pana.”

³E a mu paamua ina lotu ri fexuusan pengane. ⁴E voxo na Pailat a fin fulane, “Ri kuusan pangan nano taasaxa no pife sui a ferawaian siri. No langai, ri taxa tiis nano pana mu vuputkai xaves?”

⁵Taasaxa na Yesus a pife ferawai fulaa e na Pailat a ipul faagut.

⁶Na Pailat a toxan a saxa vilaana malaan: la palou ina fenamo nane fuuna mulus tapin a saxa mataa ti lana vipis, ta so ta mataa a mu rabuna ri taa kuus pana. ⁷E saxa mataa i taxa waan, isina Baraabas, a mataa ina rawen, e nane fevis xuvul pana xasano rabuna e fe punuk a mataa. ⁸E a malila ri savat xe si Pailat e ri fine rao i taa mulus tapin a saxa mataa ti lana vipis.

⁹E na Pailat a fin nari malaan, “Mi vubuk ne taa mulus tapin a ‘king’ sina mu Juda xe simi?” ¹⁰A fin nari malaan senaso nane texaas o a mu matalava ri lisan na Yesus lapaana taraafesuaian siri. ¹¹Taasaxa mu matalava priis ri fo farawei a malila o ri taa fin na Pailat i taa mulus tapin na Baraabas xe siri.

¹²E na Pailat a fi ai malaan, “E ne taa vil a so pana mataa mi xalie pana ‘king’ sina mu Juda?”

¹³E mu rabuna ri xukulai faagut, “Niil fataxutane!”

¹⁴Taasaxa na Pailat a fin nari, “Xenaso? A so ta vilaana saat nane fo vile?”

E nari, ri xukulai faagut paaliu, “Niil fataxutane!”

¹⁵E voxo xena famatakasamaan nari na Pailat a mulus tapin na Baraabas xe siri. E nane farawei a mu rawen sina o ri taa inis na Yesus pana yeis e ri taa niil fataxutane.

A Vilaana Sina Mu Rabuna Ina Rawen

Mt 27:27-31; Jn 19:1-3

¹⁶E a mu rawen ri xel falak na Yesus xe lana tang lifu sina gavamen (ri xali a lifu aanabe' pana ‘Pretorium’) e ri fe faxuvul a mu rawen sina mu Rom pave. ¹⁷E ri famause pana marapi raf malaan sena marapi sina

'king'. E ri favapoi a kaat sina 'king' pana yeis tuturuk e ri timine la putuna. ¹⁸E ri taxa lo suaxan na Yesus pana 'king' e ri xukulai malaan, "Suai sena 'king' sina mu Juda!" ¹⁹E ri taxa lo sipe la putuna pana newai e ri kaanus xuluna e ri turung e bukaak la nona. ²⁰E lamina suaxanaana siri ri siak tapin a marapi raf sena e ri tavai fa'ulie pana marapi sina e ri xelexe la bina ina niil fataxutane.

A Punuxaan Na Yesus

Mt 27:33-44; Lk 23:33-43; Jn 19:17-24

²¹Layaan ri savat lamalei a saxa mataa i taxa sangas la palou in rabuna, a isina na Simon ti Sairiin, na tama Aleksanda nare Rufus. E a mu rabuna ina rawen ri xelexe xena yaas xavang na Yesus pana bolo sina. ²²E ri savat pe la bina Golgaata, a malasuf ina malaan: 'a bina ina veng'. ²³E rao ri fanume pana wain aava toxan a saxa buk titiwai xena ti votan a maasaxan lana, ri xalie pana 'mur' taasaxa nane bai nume. ²⁴E voxo ri niil fataxutane xuluna bolo. E ri fepatoxan a mu marapi sina pana fetafangai pana faat, talo nase' i taa savat paamua i taa siak a saxa mo.

²⁵Ri niil fataxutane la paanen malaan sena 9 oklok. ²⁶E ri xalei a lagasai xena kuus fakalimaan malaan, "A 'King' sina mu Juda." E ri niile laa'ui la putuna bolo. ²⁷Ri niil fataxutan a ro mataa ina fenau la nu itina. ²⁸[E voxo a Xakalayan ti Kawai a kuus tuuna layaan a kuus malaan:

"Ri timine xuvul pana mu rabuna saat."] *Ais 53:12*

²⁹E a rabuna xaves aava ri taxa sangas falet faasilak, ri ferawai fasaat sena e ri liliitan a puturi e ri kuus malaan: "Ai, nano aava no fo kuus o no taa ngas tapin a lifu lotu e no taa vesan fa'ulie lana yaan talatul, ³⁰xavang nano xa e no sivimaan ti laa'ui xuluna bolo."

³¹E a mu memai priis sait xuvul pana mu rabuna aava fepitaa pana mu vuputkai, ri merao e ri fesuxan pengane malaan, "Nane fexaxaas sena xavang a xasano rabuna taasaxa a sou pife fexaxaas sena xavang nane xa?" ³²E ri kuus fulaa, "Tamo a Mataa Failai aanabe' a King ti Israel, xenaso a pife sivimaan ti xuluna bolo talo taara taa xalume e taara taa texaas sena?" E a ro mataa saat sait aava ri niil fataxutan nare vaxa re taxa lo suaxane sait.

A Maatan Si Yesus

Mt 27:45-56; Lk 23:44-49; Jn 19:28-37

³³E faasilak la belo la paanaas, a bina suk fefexaxaas leaaf. ³⁴E la leaaf na Yesus a xukulai faagut malaan, "Eloi, Eloi lama sabaatani." Lana pok bina ti pave, Erameik, a malasuf ina a malaan, "Piran siak, Piran siak, xenaso no lamon ta'ulanau?"

³⁵E layaan a mu rabuna aava ri taxa tigina faasilak ri langaie, ri feferawai, "Langaie, nane taxa xel na Ilaija."

³⁶E saxa mataa a fala e fe siak a pel e fapirause pana wain e timine la ngusuna newai talo i taa nume e a kuus malaan, “Taara taa xalum tareie ulaa na Ilaija i tamaa savatmaan xena muluse.”

³⁷E na Yesus a xukulai faagut fulaa e mui a maat.

³⁸E pave lana tang lifu lotu, a marapi molava aava taxut la palou ina Nobina Taap Xasingit e a nobina xana mu priis, a tiririk la palou e piau na mataa fe vile. A tiririk ti laa'ui xe lapia marasaxa. ³⁹Pe Golgaata, a saxa paamua sina mu rabuna ina rawen i taxa tigina faasilak la ka Yesus e a langai a ferawaian sina e falim a maatan sina e a kuus malaan, “Tuuna paaliu a mataa aanabe' a Natuna Piran!”

⁴⁰E saxano lutefin sait ri taxa lo ti kaalum lasuun famodak e ri xalum a maana vilaana ina maatan si Yesus. Nari na Maria Mekdala, Salomi e na Maria na nina Jems modak nare Joses, rutul taxa waan la palou iri. ⁴¹Paamua la maana yaan na Yesus fuuna waan pe Galili a lutefin aave ri fuuna usie e ri xavange pana maana faisok sina. E narutul xuvul pana xasano lutefin sait ri fo sangas xuvul pana xe Jerusalem.

A Xaxaafaian Si Yesus

Mt 27:57-61; Lk 23:50-56; Jn 19:38-42

⁴²La leaaf faasilak a ngaas i rul e faasilak a tangpat ina Yaan ina Fangaafusan sina mu Juda sait, ⁴³a saxa matalava sina mu Juda, na Yosep ti Erimatia aava namkai sena fatataganan sina Piran, nane a fagut a lamonan sina e fe fin na Pailat pana vipin i Yesus. ⁴⁴E na Pailat a ipul o na Yesus fo maat senaso pife xavai ri niil fataxutane e voxo nane xel a saxa paamua sina mu rabuna ina rawen e maa fine o na Yesus xo fo maat. ⁴⁵Layaan a paamua aave a kuus o na Yesus fo maat, na Pailat a kuus turoxo o na Yosep i taa siak saa a vipin i Yesus. ⁴⁶E na Yosep xuvul pana saxano rabuna ri maraan a marapi pasak e ri vil fadui a vipin i Yesus e ri xafute pana marapi pasak aave e ri timine lana liing. (A liing aanabe' ve a mataa fo taxe lana faat xena xaafaian.) E ri vil votan a matana liing pana faat molava. ⁴⁷E na Maria Mekdala narie Maria na nina Jems nare Joses, re taxa ti falim nari senaso rao re texaas sena matana xawaa.

Ri Seng Na Yesus Lana Liing Ina Mamaat

Mt 28:1-8; Lk 24:1-10; Jn 20:1-8

16 ¹Layaan a Yaan ina Fangaafusan fo taxapus na Maria Mekdala, Salomi e na Maria na nina Jems, rutul siak a mu mo lalas xena timine xuluna vipin i Yesus. ²La paanen lolof la yaan mata ina 'wiik' (la Sande), rutul falet xe la liing ina mamaat e rutul fe savat la yaan a ngaas fo laak. ³E rutul taxa lo fefiai malaan, “Nase' i taa pul tapin a faat aava ti votan a matana liing?” Senaso a faat aave a molava paaliu.

⁴E ri kaalum et e a matana liing fo talakas xo! ⁵E layaan rutul laak lana liing, rutul xalum a saxa xulau i taxa nai la nobina aava ri timin

na Yesus lana e a marapi sina a pasak paaliu e rutul ipul faagut e rutul mataut.

⁶E nane a xuus narutul, “Muta mataut! Mutul taxa seng na Yesus ti Nasaret aava ri fo niil fataxutane. Nane fo malit. Nane fo to fa'ulaa. Xalum a nobina aava ri fo famatie lana nabe' e naboxo fo malit. ⁷Taasaxa mutul falet e mutul fe xuus fatexaas a mu rabuna sina e na Pita sait, malaan, “Nane i taa sivi paamuin nami xe pe Galili. E pave mi taa xalume malaan sena fo xuus nami paamua.”

⁸E layaan rutul savat lamalei, rutul sinuf fataapus senaso ri ipul faagut pana matautan e ri radakui. Taasaxa rutul pife xuus fatexaas a xasano fefeng senaso rutul mataut faagut.

A Mu Savatan Si Yesus
Lk 24:13-49; Jn 20:19-30

⁹[Layaan na Yesus a to fa'ulaa, la yaan mata ina ‘wiik’, (la Sande) nane savat paamua si Maria Mekdala aava nane fo gei tapin a mu vovau saat pisiguak xasena. ¹⁰E nane falet fataapus e fe xuus fatexaas a xasano fefeng aava ri taxa lo taangiis e mamaxus lunai. ¹¹E layaan ri langai o nane fo to fa'ulaa e a tefin aanabe' a xalume, ri lamon o pife tuuna e ri bai langaie.

¹²Taasaxa lumui layaan a ro fefeng re taxa sangas la salan, nane savat sire taasaxa re pife taraxalie. ¹³Lumui re texaas sena e re ulaa fataapus fulaa xe sina xasano fefeng e re fe xuus nari. Taasaxa ri lamon o nare sait re taxa bit.

¹⁴E muibak nane savat xe sina mu yaamut layaan ri taxa mati fafangan e fe gil nari sena vungutan siri e sena lamonan vaang siri. Senaso ri pife langai faroxoi a kuusan sina fesing siri e ri pife lamon faroxo pana ferawaian sina.

¹⁵E nane xuus nari, “Falet xe la maana mu bina xapiak e mi tavai a mu rabuna xapiak pana Lagasai Roxo siak. ¹⁶Nase' ta mataa i taa namkai sega e i taa fasufan, nane ve, ne taa fakaxupe. Taasaxa nase' i taa pife namkai sega a toxan a fakasanaman xana. ¹⁷E voxo a mu fakalimaan anabe' ri taa falet xuvul pana mu rabuna aava ri namkai: ri taa gei tapin a mu vovau saat pana gutan lana isaak, ri taa ferawai pana maana pok bina fa'ui ¹⁸e tamo ri taa tao a tiui i taa pife xet punuk nari, ri taa num a neng taasaxa ri taa pife maat e ri taa vil faroxoi a mu rabuna pana giisan.”

¹⁹Pevox, layaan na Memai Yesus a taxapus pana ferawaian aanabe' a Piran ti laa'ui a xel fa'ulie e nane fe nai la pamuaan lana vepen sina Piran. ²⁰E a mu fefeng sina ri falet xe la maana mu bina xapiak e ri xuus fatexaas a mu rabuna lana mu bina pana Lagasai Roxo. E a Vovau Xaradak a xavang nari pana faisok siri e a fagut a faisok siri pana fakalimaan in gutan.]